





温州市图书馆

WENZHOU LIBRARY



温州图书馆

WENZHOU LIBRARY



温州市图书馆

WENZHOU LIBRARY

玉介園存稿卷之十六

行狀誌銘誄辭

質齋王公行狀

永嘉王叔杲陽德著

萬曆丙子九月封兵部武庫司主事質齋王公卒於家既踰歲其
 子永州守衰經過海上再拜以狀請曰惟是先君子之潛德將圖
 不朽計於太史公能悉先君子莫如子且夙昔遺命也不佞辱與
 守君同年同官於公為通家子其何能辭公姓王氏諱周字宗文
 別號質齋世為嘉善人自始祖五傳生彞彞生賢賢生瑜娶於吳
 生丈夫子二長用次即公也生有異資甫髫俊聲隱隱起秀水徐
 西疇翁無子有愛女欲為擇佳壻一見奇之聘為館甥徐去家可
 數里公外德舅氏而內傷違父母每晨夕東望未嘗不涕泗也同

行狀誌銘誄辭

館甥某富少年常使氣凌公公不之較惟銳氣讀書雖宴爾之初
恒至丙夜前此補秀水邑諸生試輒哀然居首每一文出同業者
傳寫殆遍人咸賀徐翁能得壻公亦自謂青紫可俯拾也竟偃蹇
不售至辛酉公已八戰而北矣猶與守君同事棘闈守君是歲舉
於鄉壬戌聯第始歎曰我平生辛苦不發於身乃發於兒造物厚
我也然有司加以冠服猶次且曰丈夫竟以是畢志哉癸亥守君
以兵部主事奉使還迎公及徐太安人入都公雖志在遠大而性
樂蕭散見九陌塵土紛擾雅有故山之思屬徐安人卒於邸舍遂
馳而先歸經紀喪事比兩月而守君扶櫬至則鬱然丘矣戊辰守
君服闋請公偕北辭曰休矣無為乃公溷也遂避居於雁湖之西
莊莊蓋書生時所築屋宇不加壯而手植之木且喬矣顏其楣曰
拱極志畎畝不忘君也益種魚蒔竹挹甕灌畦風日晴媚邀伯兄

洎里中十老為真率會月一舉酒間與三四能詩者賡和更號雁
湖釣叟足不履有司庭亦絕口不及時事已已守君晉職方郎時
鉅寇曾一本流患閩廣穆皇帝命劉司馬討之而守君以材推
為參贊兵事便道省公時公春秋高又獨居意猶豫公正色曰男
子生而有四方志吾夙昔所望於爾者何如且既膺簡命吾不
得而有子子不得而有身彼枕戈擊楫者獨何人歟而以兒女子
態視我我不願也為詩五篇書數百言納之行李而促其行大都
忠國安民御將料敵之策守君佩服就道不半載渠魁授首餘黨
林道乾等悉降閩廣平君子謂是役也公與有力焉先是穆皇
帝臨御推恩臣工自一命以上咸得覃及所生而守君時以丁太
安人憂不獲與後科臣建言推廣及守制諸臣而守君復遠在嶺
表不任時為同舍郎代之移牒銓司適守君歸自行間陳情得封

為武庫司主事蓋異數也學士大夫競為詩歌以賀海內作者幾
徧焉公既被章服愈自韜晦守令以羔雁及門請為鄉飲祭酒辭
不獲一出應之後不復往謝曰是國家盛典所以養老勸賢而教
俗也曩為諸生見飲於學宮者恒恥其不稱今何敢數干之辛未
公春秋六十有九矣守君亟圖歸養凡三具疏草以告公公不許
會互市議起守君掌武選以持論悖當道外補得永郡永去浙數
千里而遠意不欲行公怒曰爾向未親民今得剖符專一方正行
志之秋而欲竊金紫為悠游計耶勉之無令為柳生所嘲耳守君
勗二子侍公而勉之永然公齒漸高時時念守君輒書空竊歎若
有所失癸酉大計守君覲事畢遂不白公以獨子無兄弟陳乞
闕下得予告侍養馳歸而公意初不懌守君跽進曰古人不以一
日養易三公兒念大人方寸亂不獲能治民稱職是重負大人教

欲授

也公領之徐曰爾念我我尚健飯也蓋守君歸而奉公煙霞泉石
日盤桓以游公濟勝猶不減少年與客談故舊賦詩夜分忘倦稍
暇則憶所誦古詩詞為書一過守君以勞神為勸曰樂此不為疲
也不佞前歲登公之堂公治觴引滿抵掌談論意氣甚壯別後時
時訊問不絕不佞望公顏色知其安守君孝養也固以百歲期之
乃竟嬰胎疾不一言而卒守君暨諸孫咸以不獲侍湯藥奉訣言
為恨不佞以公之終也類無疾解脱者殆生平盛德之報乎公洞
達坦夷不設城府而好面折人過人亦不之怒體似癯不勝衣而
臨大義則英氣奮發萬夫不可奪友愛伯兄白首無間父沒廢箸
毋以析產以投公辭曰產甚薄復割之無益於兒而徒損於兄是
兩傷也守君既第或勸以乘時斥產為後人計笑曰書生得此足
矣龐公我師也居常食不二簋衣不紉綺故能成守君之廉至於

界原本作
介

扶掖善類後進無所不至而皆出於惻怛至誠鄉里有忿爭而欲
訟者急召三老諭止之曰若寧不自惜而欲為胥吏餌耶鎮有巡
檢司舊以市民充役市民爭走匿公曰不食其食而驅其執役民
誰應之告於當道悉得脫籍傍及他鎮咸以例免塘岸歲久傾圮
行道往往墊溺至於寒夜或有致死者公首捐帑貲倡率同志不
日遂成坦途永永利賴焉中表女金氏寡且瞽遺產為暴宗所攘
為白之有司得復舊業非其志雖千金不一染指為居間片言也
蓋公義利之界甚嚴孝悌之性天植趨善如就飲食避惡如脫水
火處約不能困居貴不能移真可稱宇宙完人其所居常揭二聯
云敝廬庇風雨無求則居之自安薄田供饘粥知足乃用之不盡
聞兒做官得美名每日焚香一炷見人加我以橫逆仰天大笑三
聲其胸次槩可見矣晚更好佛理晨起正衣冠謁家廟畢必朗誦

金剛法華諸經曰非以徼福欲借以提醒此念免淪苦海耳識者
謂公雖以子貴不獲一自申其慷慨跌宕之氣故託意於此曾再
厄於水而不至困頓未必無冥祐云公生於壬戌年七月十八日
得壽七十有五元配徐氏贈安人有刲股孝別具史氏誌子一即
永州君俸前任兵部武庫武選二司郎中與不佞同署娶顧北坡
女女二長適高東軒子什次適沈葵陽子仕孫二長廷謨娶學博
浦緩齋孫女次廷諫娶仲龍溪女俱國學生孫女三長適陝西副
憲沈霓川子庶吉士自邠次許陝西太僕卿吳江吳仰峰幼子承
次許崑山太學生魏希正幼子曾孫二長光勝聘陝西寧
夏衛經歷沈慎餘女次光寵尚幼所著有書經臆說詩若干卷藏
於家守君將以今萬曆丁丑年十月某日奉公柩合葬於西龍口
之新阡即安人先葬地公手治也不佞敬為述公之大節如右以

侯大君子採擇至其隱德細行自少迨老終始如一日非更僕所能悉亦非不佞所能盡述也謹狀

玉峰李君墓誌銘

玉峰李君既卒五年余過清源弔其廬為之歎歎者久之其子諸生寅向予泣曰先人交游徧海內沒而訪其廬者無幾人今墓有宿草塚石未銘非公奚屬時余以使事南邁未遑也又明年李生從弟宣持所為狀至京師申請余稔知李君高誼即李生不以銘屬余猶樂道之矧復走狀千里烏可辭按狀李君諱天祥字時和別號玉峰世為歙人大父某父某皆有隱德兄弟六人君其少子也歙俗務治生巨家世族皆挾貲游湖海間以為常李故高貲君年未十五從其兄碧峰君商清源因家焉少勤飭警敏甫弱冠即致饒裕君廣交樂施恥齷齪為賈人態清源當南北輻輳其所往

成

來盡儒紳翰墨士始余甲辰計偕北上會諸友皆言李玉峰者余
故得造君君所居有樓三楹日設席為款凡慕君而來者踵相接
也至有所貿易及買舟僦車咸以煩君君走家僮幹理悉如其意
迨諸友落第南還君遇之一如北上時君嘗與余言每大比歲費
至數百金其所交游既廣咸籍記名氏咸巨帙間取以扣君君類
能譚言如覩余自丁未別君東歸跼伏海上十餘載歲壬戌復偕
姪輩上春官值期迫策蹇且病將訪君求息焉及抵清源君倚戶
上望見余笑曰暘谷君十餘年不見今何來非復少年時矣復觴
余樓上道舊故余病卧數日不能食君徬徨相慰勞時有部使者
為余故人訪余卧所驚訊曰茲非李玉峰家耶余退而問君某公
亦君交游中客何不一見君曰凡我所交游者皆未仕時有以役
我也若既仕而余先求謁固今昔殊遇又能必無逆我者乎余寔

羞為也曩有某公某為東郡守數遣使招余余謝不往又治民持
重賂求援余竟不為通一字君試閱我籍記中諸公紆青拖紫者
何限今過我者何人何人耶余聞君言嘉君敬服君茲言尚在耳
也夫逐附通顯雖素昧生平者尚欲借交以通而君所交游遍天
下未仕則厚遇之當仕則深避之雖古好脩君子奚讓焉君奉其
父極孝每數千里致方物侍諸兄友愛特至曾破貲計脫姪罪里
中有所爭忿咸就君平君一言即俛首聽服往余行清源市上市
上人靡不稱李玉峰李玉峰云余以是益徵其行誼狀所稱還遺
金賑乏周急皆人所難在君固細瑣事余不暇詳述特著余所知
者如此君配孫氏生男子二人長寅廩庠生娶楊氏次宣聘吳氏
女子二人俱適士族君生於正德庚午十二月初九日卒於嘉靖
癸亥十二月 日詎其享年僅五十有四以甲子春葬於城南

丘家屯既葬之七年為隆慶己巳而余志其墓銘曰

維歛之產維衛之居迹混於商其行則儒不雄其質惟義之儲座

有高客門無駟車窮則藉我達則奚須矯矯公門羞為曳裾翩翩

令子文藻燁如桃李秋實食報匪徐後有觀者我銘其墟

大理寺寺副趙公墓誌銘

大理寺副壘巖趙公以嘉靖丙寅卒於家明年余歸自京師其孫

徽制持其姍人方子正所為狀謁余泣而言曰先大父幸受知門

下至屬纊之辰囑曰銘我者必暘谷君是以敢請余世講也宜銘

公矧其有公之命按宋南渡宗室多徙溫公之始遷祖士鏞則太

宗第四子商恭靖王元份之後三傳曰汝邊登嘉定庚辰進士官

柳州守寄居樂清公其九世孫也曾祖諱同都祖諱英魁考東湖

先生諱寧多大節善詞章為時名儒以公貴贈中書舍人妣陳氏

鄉進士裴之女贈孺人公諱性魯字師曾壘巖其別號也少穎異
有志槩尋以家難窘迫業舉不遂乃往安固從任太常道遜學大
書遂盡得其妙及聞永嘉墨池趙氏富名賢翰劄輒來就正研究
始獲與少師羅山張公暨余先君少參公仲父司成公相友善於
未第時自是玄討苟搜書法益進正德間五清劉公瑞督學浙中
文望出海內少所許可惟雅重公由是松臬許公朴溪潘公皆以
昭代鉅卿友公於翰墨之外蓋公之志節夙成器度閒雅一見知
異非獨可以書藝一途目之也嘉靖己丑游京師以選入史館預
修大明會典辛卯命書書無逸詩豳風於西內稱旨授鴻臚
寺序班辦事制敕房丙申九廟成陞中書舍人乙巳陞大理寺
評事庚戌轉右寺副時世皇方銳意文學稽古定制諸所題揭
必以屬公嘗在內庭據几揮毫上適潛至其後公忽顧驚愕甫

荀几下 上輒加諭慰內直二十餘年勞賜鎡幣無算丁內艱蒙
特旨起用其受知 當宁寵眷優渥誠翰臣中所希睹者公書
法壯歲妍妙飛動自成一家晚益清勁道逸自中規度與我朝詹
姜二公蓋先後並馳云至甲寅年且七十戚戚思引去為疏力請
於朝 上念其勤且老知不可留徑從中批允復賜金幣歸老於
東甌公澹然家居十有三年日惟杜門操翰對景賦詩屏迹郡邑
然當朝鉅公慕其翰墨者率遣使齎幣就其家丐書焉公之乞歸
也雖已年及亦坐得罪時相嚴公故事內閣凡有差遣類用中書
嚴欲用其門下儒士公引例爭見忤遂求去嗟乎當嚴秉政士大
夫畏其勢燄惴惴焉不敢少忤犯公所爭雖非國家大體然亦以
窺公之不阿終用是去其眎世之卑抑苟容老死而不知止者何
如也公孝友直諒出於天性與人交久而不衰苟闕墳籍上下古

今發為詞藻論議清緻超絕特以書翰供事近密遂掩其他長余
兄弟以先君之故其交於公也最久雖曠逾里邑而往來問遺歲
時不絕余家倡義築堡及建坊營室時有須於公公欣然揮灑不
以老辭公或有以命余即力所不逮亦未嘗不自効也余比歲竊
祿中外每遇鄉人必詢公起居公亦每每不忘教示尚冀東歸再
獲晤公而公沒矣余深用嗟悼方圖薦芻引紼以少展其平生矧
於銘石之托而敢以不文辭哉公生於成化乙巳距其沒享年八
十有二娶鄭氏贈孺人繼沈氏封孺人子二長講憲次講賦國子
生皆先卒孫四徽制徽敕徽彝俱邑庠生士禎文華殿中書能世
其家學曾孫十二某某墓在十都沙壘祖隴之次銘曰
四十始仕八十考終翰墨宗匠近侍則榮兩世通家百年論定吾
言有徵維德維令

誥封一品夫人張太母潘氏壙誌

萬曆癸巳歲首柱國大學士太師張文忠公配封一品夫人潘氏

卒越明年甲午冬季將奉柩窆於杜鰥之原世宗肅皇帝所為

敕建地也其嫡長曾孫國瑞既伏闕上書乞上恩賜祭葬

有加逾常典乃復同叔汝紀詣杲請誌墓中石杲惟先大母於文

忠公為女兄先父叔參議公祭酒公分為舅甥齒則相若且居同

學仕同朝杲自垂髫寔侍後先獲聞文忠公事知夫人始末最詳

今夫人諸子俱蚤世諸孫之生也晚既屬杲志杲何敢辭文忠公

初載以名世遭逢聖明贊定大禮弼亮中興及諸所建置燭赫

中外而一品夫人蔡氏襄內政冢嗣中書公以賢孝聞歲己丑蔡

夫人卒於京邸中書公時甫弱冠哀毀骨立幾滅性文忠公甚哀

悼屢疏乞致政不許時先參議公為禮部郎是秋偕中書公護蔡

夫人喪東歸文忠公語先參議曰吾盡瘁國事義難顧私第壺內
無主奈何子行矣盍為我計之先參議曰謹受命至東嘉徧求良
家子鮮當意者聞栝之景寧有潘氏女年二十八矣性沉靜婉嫵
有女德未字且其大父鶴山公諱琴者以進士守興化父梅窗公
諱寔者以恩貢入太學右族也乃以禮納聘辛卯先參議復同中
書公迎就京師事聞肅皇帝命中官齎賜妝具金帛襄嘉禮是
為潘夫人而中書公亦以服除娶程氏潘夫人既歸文忠公執婦
道昕夕辛勤尤鍾愛中書公不啻己出中書公外嚴事文忠公內
孝養潘夫人如寶出已未幾中書公竟以傷蔡夫人抱羸疾死程
氏亦以悼夫嘔血繼亡潘夫人悲痛殆甚乃護其喪先歸再越歲
文忠公亦以憂傷遘疾南還夫人佐湯藥起卧扶侍蓋衣不解者
三年矣文忠公嘉其賢勞乃力疾具奏請封時肅皇帝幸承天

得疏即頒 誥寵封一品夫人嗣是文忠公病愈篤竟不起是時
次公尚寶年方十五季公中書甫三歲遺囑以一切家事無大小
悉稟命於潘夫人潘夫人仔肩家務修闡政禦外侮井井有條暇
則與陳太安人王太孺人誦經禮佛中外肅然又時時以承家報
國之義訓其二子以故次公承尚寶著直節竟以忤權貴左遷季
公就官中書亦恂恂稱佳公子皆夫人力也次公尋轉太僕與季
公同宦京師夫人猶獨當戶庚申太僕公忽以疾卒於官中書公
亦以歸省至金華先歿夫人相繼聞訃悲可知也更為拮据後事
時季公亦無嗣惟次公有三子夫人名諸姍族曰今季無嗣禮宜
議當立者顧長子為蔡夫人出嫡冢承桃久虛未立先太師之志
所謂著代者云何是宜以長繼長以次奉父以三承叔庶情理兩
協時以喪事總總未暇定議先以仲孫汝紀繼伯以季孫汝經繼

決

族原本作
簇誤

叔至萬曆壬午汝紀將之官乃告夫人曰今以汝紀繼伯矣祖主
 仍兄祀於情禮盡未協夫人仍召族戚告文忠公家廟改題長孫
 汝綱繼伯承祖長孫光祿君復泣愬曰汝綱為父也子奈何為伯
 也子用是前議竟未決夫人每憂之甲申長孫光祿君以就選卒
 於京戊子陳太安人捐館國瑞猶以長曾孫服重辛卯仲孫以刑
 部郎奉差便道歸省夫人泣曰吾耄及而長子之祀未定異日者
 何以見先太師於地下乃集族眾并召杲杲請所欲言曰我因子
 先公歸於張門六十年苦難盡訴今但得立長子之祀世奉粢盛
 死即瞑目矣仍請於郡大夫陳環溪公求為定議亡何夫人以天
 年終長曾孫國瑞仍承父繼長主文忠公祀子子孫孫奉祀不絕
 以是知夫人之慮固已遠矣杲嘗謂立人之道惟大綱為兢兢文
 忠公事肅皇帝道合君臣倫明父子至今稱中興賢相蓋無兩

| | | | | | | | | | | | |
|---------------------------|---------------------------|--------------------------|---------------------------|--------------------------|--------------------------|-------------------------|--------------------------|--------------------------|---------------------------|---------------------------|---------------------------|
| 士高師堯次適庠生王近臣次適王啟臣次適太學生朱君顯曾 | 祿寺署丞娶葉氏孫女六長適儒士侯任邦次適吳光幹次適儒 | 次汝紀任刑部郎中陞龍安知府娶李氏封宜人次汝經任光 | 署丞朱邦采陳太安人出孫男三長汝綱任光祿寺監事娶周氏 | 仁次適鬱林州知州王一夔封孺人俱蔡夫人出次適鴻臚寺 | 人王氏封孺人女四長適太學生王淵次適鴻臚寺序班聞得 | 封太宜人王太孺人生季公遜膚任中書舍人娶薛氏贈孺 | 人生次公遜業任太僕寺丞贈奉直大夫刑部員外郎娶吳氏 | 人生長公諱遜志任中書舍人祀鄉賢娶程氏封孺人陳太安 | 人生於弘治甲子十二月初四日距卒年享九十夫人無出蔡夫 | 嫡長定宗祀尤生平所最注念德茂重闡慶流後裔豈虛也哉夫 | 焉而潘夫人相文忠公於立朝之日以迨身後辛勤萬狀至於重 |
|---------------------------|---------------------------|--------------------------|---------------------------|--------------------------|--------------------------|-------------------------|--------------------------|--------------------------|---------------------------|---------------------------|---------------------------|

孫男八長國瑞郡庠生娶林氏次國禎郡庠生娶王氏次國祐娶
邵氏次國祉娶李氏次國禧娶趙氏次國琦娶鮑氏次國禛聘林
氏次國禔聘林氏曾孫女六長適郡庠生陳君籌次適儒士金一
誠次適庠生林世禎次適林邦世次字林邦綸次字王士顯玄孫
男七長世卿次世美次世相次世仁次玄孫女三尚幼法宜
具載

宮保大司寇謚莊僖繼峰舒公誄辭有序

余受知於臨川繼峰舒公海內無兩也公訃聞余為位以哭緘詞
致奠其冢嗣治中君體震走使數千里東書帛致公遺言予讀之
悲咽且命予誄其墓維公純德懿行表著士林直節忠猷紀載
國史諸名公鉅卿誌狀敘述備矣予不文老且眊又烏能贅一辭
哉公隱衷卓識潛修玄思尚有誌狀所未盡述余托交於公三十

餘年知公之詳信公之篤誠莫如予誌狀論次者不敢述謹以生
平相與期許者敘之粵嘉靖乙丑予同公被召命都門邂逅傾
蓋投知公入省垣予補郎署時多建白皆予所目覩穆皇新御
柄臣專恣公力持國是累疏抗衡衆莫不為公凜凜而予獨快公
公每以不得予共事為歉柄臣以計中公緣憚公論出公藩參公
遂毅然引去萬曆癸酉尋起督儲吳中予亦以備兵至相見驩甚
吳賦役繁重民困供輸公痼瘵在念旦夕為憂以予久官吳習知
吳事相與調停每有釐革不自居其功輒曰王君力也越三載公
遷晉臬依依不能別乃各頽像以志不忘時江陵當軸素器重公
因以及予欲引以自輔公語予曰張公誠宰相才惜其心未純烏
能用賢恐不能善其後吾輩宜濡足抵晉未幾復引去再起河
南藩使公以資望深碩隨晉同卿時予已解吳節歸公自洛走使

致書為予喜而自惜未能脫去予報書曰吾齒長公十年公十年
後歸未晚也居頃之陟刑侍今上銳意圖理特旨簡為大司
寇公感知遇益殫心報稱著條例為令法紀肅清會忤貴戚又不
合於時相累疏乞歸語詳誌狀中時予林居已十年公緘書報予
曰幸已得告不負夙期矣舟抵澱水當取道過陽湖傾倒數月會
北河水涸由陸歸遂不果約予遣家僮候公於山中公留之彌月
既辭歸公徒步送之數里曰我不獲見若主於汝行不能不戀戀
也嗣是書札往來無虛歲丙申予生八十公為文走使致幣復手
書詩軸為予壽今年冬為公七旬誕辰予方撰文稱祝冀以報公
迨秋而公訃音至矣痛忍言哉痛忍言哉公身雖勇退而中外善
類日望公再起以弼亮仔肩乃公堅志高卧輔相之業未竟厥施
朝野倚以為重而公之自視則歛然也公嘗謂予曰吾二齡而孤

備嘗艱苦藉母夫人及伯氏督教以有今日公篤學力行得於天
性平生不妄言笑稍長聞陽明先生良知之說恍然有悟遂精思
力踐總其學以主靜持敬為根底以不媿暗室為實功與人論學
惟以一二喫緊處相砥礪不事聚徒自立門戶槩於辭受取予進
退出處細大始終一以聖賢為法程以予所睹記古先名臣醇儒
稱真知實踐者公誠無媿矣公卒後賜謚及祭葬恤典昭備論
者謂公不朽云冢君卜以是歲仲秋襄公於禪和山之麓公自林
居常住龍岡山與禪和相直愛其勝遂卜葬焉予以衰老不能躬
視公窆為歉遣豎子往會葬因為之誄曰
天挺我公稟德粹白正氣貫虹壯心矢日鵲起明廷聲猷赫奕子
視黔黎家理邦國補袞諫垣指陳不畫側目柄臣肆力搏擊落落
朝端藩臬駁歷亦有見知推轂國士公察彼衷未免有己蚤戒濡

足先幾知止跡謝磷溜望懸朝野匪抗匪隨累歸累起司回貳刑
一節終始帝稔知公爰切毗倚司寇特簡佇隆宅揆為忤權貴
引疾勇旋乞身未老衆望缺然素嗜名理鴻博精研主靜不欺見
破拘攣聖功力踐秉道彌堅既返初服杜門著書桂蘭茁秀家政
肅如善濟循吏武繩純儒十年泉石已躋古稀誕辰倉介箕尾速
騎屬纊先日正寢端居沐浴衣冠稽首北面平生所學於斯可見
帝聞公逝撤樂減膳錫謚營丘恤隆殊眷三立不朽士林依戀
嗟予與公誼如同氣寒暄起居歲時罔替方修嘏辭忽報訃至蒿
目剗腸寢食幾廢流水高山傷心隔世禪和新阡鑑賞夙先龍蟠
鳳翥庇蔭後賢衣冠往即慶貽萬年執紼靡送臨風淚漣靈光百
世我言永鑄

刻梧亭朱公墓志識後

公之子潤身與杲同舉壬戌進士潤身制策進御即得授南考功
郎三年將赴銓司考績時梧亭公沒且十餘年矣墓在天關之麓
潤身建祠墓左冀旦夕可得贈典一新其扁碣乃遽有滇南憲僉
之命時杲被召過留都潤身訪杲郵舍涕潛然下曰先君篤
行未彰潤身幸叨一第日冀霑一命求名公表墓中石今垂成而
復外徙將何從再霑恩以慰先君於泉下吾行且休矣杲為之慰
解再四潤身勉行至楚果以疾告杲從中沮力勉其行未幾為忌
者所中竟左遷屢量移至職方郎與杲同舍會杲出守天雄潤身
又逡巡歸山中將為終焉計杲屢書趣之曰若忘郵舍中之語乎
潤身乃勉起今上御極覃恩得贈梧亭公如其官始請蒲坂楊
少師志其墓又明年潤身手錄少師所為文寄杲吳中曰今日乃
得畢吾志即死無復憾君為我求名筆書以勒石杲以竊為潤身

喜俄而訃音至矣杲持書菊皇涕泣曰嗟乎吾固謂書中語不祥
今果為讖耶夫以潤身平生之所樹蓄何通顯不可致顧偃蹇郎
署十餘年不獲一展其平生所差可慰潤身者惟斯文耳杲烏敢
後潤身之託於是礮石求文休承書而勒之用以慰潤身於泉下
云

明奉直大夫戶部員外郎約齋王公墓誌銘

萬曆五年正月十六日予師約齋先生卒於家予聞之為位而哭
乃厥子學裘等卜是年十二月初八日葬邑之萬安鄉先期遣使
二千里緘所自為狀詣予吳臺請銘公掩幽之石予手其狀泫然
而曰嗟小子烏能文顧纂述遺行弟子之事又烏能辭不文乃技
淚按狀公姓王諱一言字行恕號約齋王之先自江左舉族遷閩
元末兵亂又自閩縣遷玉融里遂世為福清人父諱某號怡菴母

某氏公生而穎異少不好弄志恢然大也怡菴翁謂兒貴徵種種
他日殆興吾門乎乃植三槐於庭因王姓且祝公遠器云稍長治
戴氏禮博洽強記文成道麗可誦燁然負髦譽顧累試不售怡菴
公已捐館舍而家務搶攘公悉力酬應不暇給乃告其室人曰嗟
男兒胡可役役白首不成名乎汝當專吾家事吾母吾負笈境外
不第不歸矣遂入省會從諸名彥游相與佔畢考訂凡八年於外
學益邃名益高歲甲午舉於鄉魁其經乙未聯第進士丁酉拜行
人奉使江藩却例金不受清譽騰翥庚子晉地官員外郎司權稅
憫民間白糧加徵之苦奏釐其弊疏若曰江南民力竭矣輸白
糧且不堪命矧徵額外乎上謂司計郎言是特詔蠲之江南人
至今飲公德云癸卯坐元旦失朝左遷浙江布政司照磨甫蒞任
會當省試適同年雲川舒公汀按浙主監臨知公夙挹文學檄入

城

場供事曰伯樂可使不相馬乎乃公所取士卒號得人云守官浹
暮鄭端簡公為選郎廉公量移留部會柄國者嫉端簡疑與公有
私謁徙端簡補外而罷公官公聞之頓首曰始臣罪大譴薄慄慄
懼不勝茲蒙放還田里保餘生上恩厚矣乃怡然歸歸即閉門
讀書一意玄覽苟及稗官野史陰陽術數之篇靡不精究其旨暇
則著田間冠與故知為歡會而獨於請謁縣官輒謝不往或縣官
有大疑大政悉來咨公公又吐誠籌論不為讓當歲壬癸間島夷
假商販入漳泉行劫勢張甚公憂之歎曰福清省外戶也且濱海
而不戒一旦寇至誰與捍者眾唯唯難於慮始公排之力謀諸當
道卒成城又募藥弩刀劍為戰守計屢挫劇賊時縣尹某很而疎
公覺之攜家入省乃福清果不守公號曰百萬蒼赤纍纍暴骨於
郊圻間吾不忍視也乃乘賊間捐金募壯士收瘞之又奏記於督

撫曰城破人亡矣官家奈何推矢自衛不發一鏃乎督撫暫與之
兵公率家僮導而前奮擊之賊乃遁入島嶼民得稍還故業福清
不至為墟公之伐也天性孝友父怡菴卧疾三年公拮据求醫宵
旦侍其牀不解帶父歿痛甚二弟少也悉力教誨俾皆游於庠而
盡歸父所遺不取妹則捐貲置為裝嫁之曰吾不忍女弟亡燠所
也入仕未久顧介潔自將恥挾官中一物僅僅圖書歸矣有山田
數區率僮僕力耕之歲食其入而無羨儲家人屢告乏為著空齋
老人傳以見志而意度更豁如也優游林下餘三十年乃一日無
病卒卒之夕猶端襟危坐諄諄訓諸子格言且戒無作佛事以傷
吾素從容就瞑嗚呼公可謂得正而斃矣邈其生為弘治癸亥五
月廿七日卒於萬曆丁丑正月十六日享年七十有五配施氏側
室劉氏朱氏陳氏赤氏子男十二人某某女五人孫男七人某某

孫女五人曾孫女一人嗚呼憶昔癸卯予弱冠試鄉闈謬學古文
詞詭於時好主司棄不錄公閱備卷奇而收之廁門下士之末公
屢厚望予遺書策勵曩過訪吳中留數月視公沃顏漆髮勤步健
飯竟所至百歲人也臨歧分手尚冀入閩一晤以報公恩乃未幾
而倏傳訃矣傷哉儀容遂杳知己未酬予何能忘於懷也傷哉傷
哉今諸子若孫林然好脩滿在庠校三槐之植未有艾也嗟嗟公
亦可以瞑矣予為銓次其行事系之以銘銘曰

大夫登朝才猷膺膺一黜而還壯志未鼓歸視其家烏夷苟午乃
贊城工衛我鄉土除難安黔厥功斯溥半世林泉清節愈苦稀年
考終槐芳正吐諸子璘珣曾玄亦玀報者在茲享此全祐埋土高
原封之若釜

玉介園存稿卷之十六

玉介園存稿卷之十七

永嘉王叔杲陽德著

雜著

王氏世錄紀語

杲分憲吳中伯兄以先世行錄寄示屬梓之杲自念家食時侍先大夫肫肫以忠孝仁厚為訓竊祿以來祇服遺言夙夜期無忝未能也頃讀家錄而吾父祖身教又儼然面命益兢惕於衷焉昔漢萬石君子孫多貴顯乃其家以孝謹聞唐顏氏後賢維衛社稷率本於家訓我先世所培植以遺我後人者是惡可以不念哉是惡可以不念哉梓成歸之家塾書此自勸兼以勸子姓云

王嫠傳

王嫠者三都朱某妻也無嗣抱養血淤雛曰朱守明既長相與拮

据起家置有資產朱某卒其弟紇利其產與子守成謀以異姓逐
守明而并之訟於縣尹林公廷璣因納賄於糧里鄰佑通同保結
以共擠守明時本都耆老周守謚知朱氏起家之因母子情愛之
篤獨為力爭縣尹泯於糧里親支之說反以周為妄周遂辭去守
成夜以衣布餽周內室以要周周曰吾方為守明白其事而未得
可私受守成餽乎即揮却之周度守成善賄囑己獨力不能爭乃
疏其情令婺愬於府城隍且背負其疏沿街叩首行呼稱冤如是
者五日婺忽疲倦仆地恍見神降於前紗帽緋袍訊其事取背負
疏讀之且讀且點首曰好耆老竈神能直奏汝可即圖之婺與守
明奔告周周遂為疏俾焚於竈越三日晨興天忽晦冥怒雷磕磕
縣堂昏黑不可辨尹驚起籲天自訟頃之眾驀見火光飛騰於縣
西南時諸奸黨方會飲於大州橋王家樓上謀同具結覆縣有書

生王汀者讀書樓上忽腹痛起如廁俄而火光徧燭樓中雷轟然大震紇與守守成悉斃於座褫其衣中而碎之挂檐牙間投屍於地其黨王九慎亦中雷斧立臨其頸瀕死而甦觀者驚駭傾於九市市人奔訴於縣林尹媿服皇懼速請周耆老詣縣為之奉酒挂彩以鼓樂送歸於是嫠乃得理母子得終相依焉是年為弘治丙辰周年五十有五方抱孫諸賀客因感雷事名其孫曰感後登嘉靖乙酉科秋榜人咸謂周公陰隲之報云

暘湖野史曰余嘗謂衣冠之家不幸而無子則循昭穆而立其兄弟之子此不易之定理所謂兄弟之子猶子也至若齊民中年無嗣稍有資產其兄弟子姪輒利其有日冀其不復生育甚至兄弟妯娌遂成仇讐故寧抱遠支異姓以自育情無殊於親生及身沒彼此構訟必至空其產而後已而問官每每泥於親

支昭穆之說右子姪而逐異姓夫人之所以相與者惟情耳情
與理同條而共貫者也情既乖離則親疎又何問焉況所爭原
為貲產初非為宗祀也故余宦游所至凡遇爭承繼者若其資
產原係祖父所遺而其子姪又貧乏則量以分給若由其自創
而子姪情又乖離已甚則悉付之撫養繼祀而罷其告爭者余
見吳中每有以女贅壻名曰布代其子姪悉置弗爭此雖不可
為訓然亦以情推之也故律原有血淤抱養及心愛之條今觀
朱守明之事益可以徵人情天理而世人之子姪欲謀奪伯叔
之資產者亦可以知警矣

敘述南樂魏氏世誼始末

隆慶庚午余自樞省出守天雄時值督學使者校文見南樂魏生
卷甚奇之時余初至郡生又迫秋試未暇與談也明年余開元城

書院築齋舍羣十二庠諸生讀書其中名魏生來謁余見其儀狀
端秀意必為世家子詢知其尊公曾為郡倅後余至南樂因造焉
所居一廛僅蔽風雨翁年近七旬恂恂然言若不出諸口雍容凝
重宜有厚享者出而叩縣令令言翁兩倅郡其在青州也駐劄顏
鎮鎮為繁區數年所積罰鍰數千金翁毫不染指晚得三子俱穎
異翁笑曰諺謂有子萬事足無官一身輕我其歸乎悉以鍰金申
貯府庫僅策一蹇驢驅小車而西及抵里其居舍已為同居兄鬻
之鄰人矣翁悉置不問乃假館於其內兄余聞而甚驚異曰翁誠
古人哉因為購宅於郡城邀翁橋梓居焉翁力辭弗就告余曰某
薄田在邑中歲時督耕以供饗飧勢不能復至郡當令仲季二兒
居侍門下耳時伯子篤孝養頃刻不離翁左右余謂曰君才質非
凡品奈何不赴書院修本業伯子曰某兄弟三人兩人既侍師席

某當留以養老親且南樂百餘年未嘗發科第今兩弟質幸可進
藉師督教異日得邀一科名幸矣某何敢復過望余曰君遠到器
也宜自愛即弗赴書院余所課諸生題願留心弗置明年督學使
者傅仁泉公知余屬意課士特詣天雄謂余曰公加意人才諸生
中得無有穎出者乎余曰魏多美質惜鮮裁成今各庠諸生萃書
院中者多科第士若南樂之魏長垣之李他日不獨掇元魁皆名
世才也傅試而奇之已而余還吳中治兵使者癸酉李生果中鄉
試第二人而翁季子允孚與諸生同登者十六人丙子仲子允中
中順天解元伯子亦在高列諸生同登又增前數亟馳書慰余曰
某兄弟藉老師陶鑄今俱得列科名誠百年來所稀有即擬渡江
東來謁謝緣上南宮期迫明春即不第當摳衣謁函丈已而伯子
季子俱聯捷而仲子竟未第時江陵方柄國奇其才欲延與諸郎

同業仲子以多病親老固辭歸復報余書曰某本欲即上謁頃以
疾力辭政府招今若復遠出恐貽老師累乃江陵竟以伯子授荆
州郡理實欲招致之也余貽書白仲子謂長君既為理於貴人之
郡誠可謂向陽花木然何如歲寒松柏慎無輕濡足也庚辰仲子
舉進士第三人及廷試當柄者故抑之置三甲第一傳臚授太
常博士江陵柄鈞既久一切多專恣時余避江陵知謝歸里仲子
每書勸余毋輕出江陵閣中票擬多任意仲子與一二知己每私
譏評語聞江陵幾隨危墜中丞張崕峽公嘗為北郡監司夙知仲
子行部至溫語余曰公所屬意高弟頗以意氣自好因備道前事
宜亟移書戒之余即裁書附張公勸其善自韜晦毋以口舌取禍
太常固美秩他日嚮用未涯也仲子報余曰老師昔謂向陽花木
何如歲寒松柏固業已命之矣門生素志豈在得美官哉居頃之

江陵敗仲子轉銓部郎季子久在刑曹典文晉中未幾相繼淪喪
獨伯子以親老乞養歸翁強之出曰我年雖耄幸獲能強飯兩弟
既已奄棄爾烏可不出以報朝廷酬知己乎伯子又勉起遷京
兆納言顧賦性素強毅遇事不能忍默每每抗疏言時事今上
嘉其忠晉擢為都御史巡撫晉陽伯子之撫晉陽也至即儲軍實
祛積弊小者斧斷大者疏列無不當上意旨至於裨身儉約為
僚屬先歲當軍需數萬緡銓司以伯子久勞於外數議內擢伯子
亦以親老乞養上皆弗允蓋倚為西鄙長城云三年秩滿奏績
得封翁如其官時翁年九十矣翁平生以端謹自持與人無忤其
蒞官也所至以仁廉稱乃竟泥資格不得位通顯而天所以酬翁
者三子聯登諸孫繼美而又享上壽膺榮封其視取快於一時之
榮溘然如朝露者其得失輕重何如哉翁又嘗與余言初貢入成

均時受知於大司成永嘉王鶴山公蓋余之仲父也而翁之諸郎
又與余有一日之雅似若有宿緣者翁壽九十余以衣幣為翁賀
今年余八表伯子走千里使贈余壽章余既不能文勉賦一歌以
壽翁復敘述往事命兒書一冊以酬伯子庶幾垂之世講不替云

常熟譚曉祠議

譚曉者邑之東里人也家世業農與兄照以力田儉嗇起家曉善
心計取利靡不至遂以貲雄邑中照持門戶曉總家計兄弟于于
如也每飯必同几曉不至則照不食曉有女無子意屬其兄之子
培培為人奢傲習見其家殷盛鄙父叔所為好外交浪費頗不當
照曉心而御其僕從甚嚴僕從輩咸弗堪也曉妻錢氏溺愛其壻
徐氏者徐為人狡險幸翁無子日晚其藏覲焉一日曉病亟徐詣
前請曰脫不諱誰當嗣者曉叱曰我兄固在爾異姓安得預照至

寢所問所疾曉悉以家籍總鑰委之錢氏從傷泣曰一生辛勤今
盡以歸伯氏我母子將誰托矣照聞泣下悉以還曉曉竟死錢竊
其鑰與壻徐日徙其藏照傷弟死不忍問也培不能平兩相媾疾
徐與錢氏及家人輩某某者竟以奸謀戕培蔓而及者幾人遂構
大獄是時適寇亂謀城邑徐乃謀獻其貲五萬為城費官司因歸
功於曉祠之歲給其妻錢氏若干緡徐亦藉以免死其獄至今坐
無辜者二人夫曉以勤嗇樹貲及身死舉為城費於一邑有保障
功祠之宜矣然照與曉未分異曉既死無子矧又立培其貲產固
皆照有也照傷弟情切壻竊其財而置不爭戕其子而冤不雪家
坐是蕩析抱鬱忿終其身口未嘗言城為己功誠可稱長厚哉雖
闇於大義其心良可悲矣今祀典追及於曉而優異畧不加於照
錢徐者固罪魁遺孽也得免於誅幸矣而又歲給之衣冠甚哉功

罪之弗當也余故著其始末俾邑之祠曉者他日宜并以及照而

錢與徐悉褫奪追論庶無遺議云
譚曉死照之子培既服衰承重培生員徐自成不利於立長乃
謀於錢氏另立族之幼少者懼培不能容遂謀殺培厚賄入莊
周仁卿以捕鹽盜為名瞰培往莊夜培殺之詰旦眾已喧傳其
捕鹽盜培驚起忙乘小舟遂於舟中陰鈕石溪以都掌科謫常
事培妻周氏赴訴於縣時署縣為山陰鈕石溪以都掌科謫常
熟丞徐以五千金行賄竟坐罪於家奴沈木金郎謂舟覆溺死
又懼眾口莫掩時值倭寇方起縣謀築城費無所出錢氏願輸
二萬金為城費冀免罪又為曉立祠褒之以其冤彼獄竟以沈
所周公與鈕同鄉且係先輩不欲為異同遂草成獄又多方彌
木金郎抵死代周者尚仰山公按吳知其冤彼獄竟以沈
縫僅以徐自咸謫成嶺南後周以御史提督學校徐具訴又
得復學肄業余嘉靖甲子調任常熟因審監細閱招卷及訪輿
論甚為不平適河南溫野公按縣審錄余以二囚無辜代發
其事而觀所資公為吳撫臺又復中止以告無辜代發
而徐竟以譚氏資公為吳撫臺又復中止以告無辜代發
議付照家侯周公離緣上官多所掣肘難聲其事因譚
冤竟以徐抵罪殺之吳後刻之後巡江公睹祠議盡發其
沈木金郎始得罪獄之

赤城集跋

赤城集跋

杲少聞台之石梁王先生云吾台文人前有方遜志後有夏赤城
蓋心竊向往之乃行集已行於世顧安得所謂赤城集者而讀焉
茲承乏常熟則侍御俞公襄夏集定本若干卷命刻之縣齋而大
司寇趙公寔校序之於是讀其集思其人幾古之作者矣而益徵
石梁先生之言不我誣溫與台相唇齒杲之先自台而徙溫是赤
城者又杲之鄉先正也是舉也表賢右文二公有焉後或有覩斯
集而知吾鄉之有人且謂刻者之不為無助是固杲之樂於吾役
而幸於附名者也工訖爰綴斯語

書陽湖三記後

蓋嘉靖壬寅歲予方為諸生愛陽湖山水之勝旋購得之稍稍芟
榛蕪樹花竹建亭榭浚陂塘而勝漸增後出仕中外垂十五年每
憶故山景物形之夢寐輒丐弇山王公鹿門茅公並為予記之大

都畧備而丁丑歲予獲謝吳兵政以歸湖山如昨而手植已拱矣
是時已絕意世路念河清之難期撫榆景之可惜乃益大治之陋
者苟斥闕者旋補績者第復故者聿新或位置弗當則徙作它所
或品題未雅則易以別名比之疇昔為勝大倍復請於弇山公得
後記而始詳矣顧眎前二記中多不合然不合者人工點綴而湖
山大槩未嘗少異矧二公文章大家片言足使園林增勝予故併
存之大司馬崱嵎公行部海上過而樂之為雜咏十首嗣索和於
弇山公公以不廉戲我要乳柑三百顆為報後海內同聲題咏者
漸多積以成帙予盡梓之以紀茲墅一時之遇云

玉介園記畧

先大夫崖翁自鄉徙居郡城之墨池坊南環清渠東包華蓋山
之麓有太玉洞天迺晉容成子脩真所予購隙地為園介在太玉

之西因名玉介園廣十畝許故多植橘嘉靖己未予即園翦闢榛
莽改葺垣除築軒面華蓋峰署曰挹華軒後逼委巷市舍囂雜復
漸購益園之左隅友人東泉程君雅嗜花卉尤善種菊予因以園
屬之於垣之四周徧植松竹槐柳預除營布明年辛酉予偕計北
去入仕途丁卯以使事過家復理舊業稍稍就緒隨復北去嗣守
魏博備兵三吳先後凡八載丁丑幸謝政歸覩前所植松竹花卉
蒼然成陰矣滋培則藉程君力也乃亟命工肆力營葺起自敝廬
之門前夾叢槐引道東向於垣西闢門以入甃石為曲徑長數十
丈旁結花籬蒼翠交加日中常如暝蔽名團雲徑徑側列海巖又
設石列坐覆以蒲團由徑折而東過半編竹為小門入橘圃署曰
最景園取蘇長公橙黃橘綠句也門內結雙檜為亭通小徑兩旁
引雜卉為籬夾以栝松林林如蓋振步而上為爽然臺臺後有方

池山泉澄湛畜金鯉魚數百尾登臺以望則海上遠山四出而附
郭海壇諸山擁翠屏列於園之後橘柚松桂秀色相接憑欄周視
爽然如御風矣出最景園而東為小門牆四周之中多植片竹數
百竿雜以嘉樹芳蔭交覆而編竹闌其四旁森涓幽雅炎暑不到
亭其中曰蒼雪隲亭後復闢小門入叢蘭館館中置幽蘭數十盤
脩茂殊甚而衆卉間焉館後有靜室檻臨小池畜花色魚百餘尾
室四壁多置古今名家書畫器玩由館折而西有庭北當海壇山
左右松竹交蔭署曰華麓山房庭前結山茶為屏屏後橫列石隲
植各色牡丹數十本稍西旋入小門多編寶珠茶夾徑為籬中植
古檜蟠結三星庭面之挹華軒則直其中也茲軒東向去華蓋峰
二百步許而舉目可挹嵐光靄翠常侵几席間蓋園中之最勝也
軒側有兩古槐夾立夏時垂蔭蔽壇軒後為石隲廣數丈置太湖

應德錦川諸奇石覆以枯松又植奇花若玉蘭海棠射豹川娟紫
微石榴山茶丁香諸種百餘樹四時花不歇由軒右側徑為門東
望華峰雲陰飄襲署曰翠雲扉入翠雲扉折而南為堂堂前歲種
菊數百本森秀盈除花時雲錦爛然結賓朋宴賞署曰餐英館北
為樓樓東面橘園松徑紆青遠山浮翠引眺華山紂宇峩峩松靄
間至是盡收園中之勝而初陽從海東升光爛翠叢中朝景尤麗
因署曰青旭樓下為室中置古書圖畫為偃息所樓側有池為晉
王右軍墨池蓋守郡時嘗臨池作書故址猶存志所稱墨池坊以
此也今重闢而軒其上環以朱欄題為右軍洗硯處池軒之後有
曲房十餘楹為庖溷及賓從信宿所左側有小門仍入團雲徑達
蒼雪隍隍東重門而出有徑百餘步夾植桂柏循此登華蓋山曰
通華徑折而南有門翼然榜曰太玉洞天由門陟嶺有泉出石罅

間亭其上曰蒙泉亭嶺折而東數十步又折而北有泉涓涓出石
龍口甚甘冽足供一方之汲雖旱不竭志稱一清泉郡倅馬公亭
其前曰清泉亭其下為東甌王廟宏偉壯麗與帝居埒又為王謝
祠以右軍康樂二賢治郡流聲合祀焉嶺又折而南百武望東躡
級而上為資福寺宋林靈素脩真故址也華蓋為郡主山屹立屏
展寺門正據其勝俯視城中官廨民居萬井鱗次街渠紘布左帶
長江右環諸溪四山列繞數十重登眺間令人接應不暇真一方
偉觀也榜曰江山勝覽寺久廢予既葺東園藉茲山為勝因命僧
重構頗增壯麗左畔有隙地為灌莽所翳余芟夷之得平址畝許
面南築小堂由迴廊而入周以矮垣正直巽山塔盡收郡城遠近
東南諸景榜曰華陽淨宇寺之右故逼嶺予移嶺稍北十餘丈闢
其址為樓五楹俯臨江流如在足下江心亭中浮海面雙塔刺天

雲帆來往四顧若圖畫其勝不減吳山西湖而松竹交翠擁匝奧
區不見闌闌楸曰凌翠樓寺後有僧舍舊址稍夷之結上方菴九
楹可為禪定所出樓達沙門折而北有徑繞樓外垣之下古木叢
覆其蔭茂甚徑穿蔭而上凡數折陟華蓋山顛為亭曰冠華郭外
之江山川原望中可盡盤旋而下指視玉介園綠陰環接林麓則
若跬步間矣昔謝安石居有東山所至築丘象之子居鄰華蓋山
志稱東山山人自家食至入仕寤寐於茲園之培植布置率預於
數十年之前乃今亭臺池館次第幸成而華蓋上下諸景亦爛然
易觀其徼惠於茲山者豈一旦夕一手足力哉園密邇居室望華
蓋山如家山朝昏風雨予嘗憩其中偕昆弟朋友讌笑卒歲是娛
晚景而樂天倫咸屬於茲園也非得命世作者告於草堂之靈何
以托於不朽謹述梗畧以請云

地理緒訓摘要

予既博覽地理諸家書然要其正法門不過葬經金匱等經雪心
捉脈等賦即今所傳地理四書五經備矣亦猶吾儒所業之經書
也他如管公明之指蒙撥砂王希逸之心經語錄亦誠有玄妙處
所當竊搜者也至若天星理氣之說以為出自九天玄女托言仙
傳不免涉於玄遠能兼用之固無不可然予每證之發跡舊墳類
多不合誠亦不必深泥也予又嘗謂此術固在博覽然亦自有妙
解處大要全在心思眼力雪心賦所謂看格猶勝看書知之者不
如好之者此語甚切當後之人倘性原不好此術而又無暇竊及
然又恐懵然無知為庸術所惑不免妄扞以致傾覆漫以要緊數
語著於後後人當留心焉
夫求風水固在眼力心思財力然得之亦自有緣要在積德累仁

以為之本指蒙有云主家積善尋龍穴顯不善之家得龍穴差雪
心賦云欲求滕公之佳城必積叔敖之陰德語云陰地好不如心
地好斯後人所當深味者予所得諸地初不假江湖術家之力每
與景暘姪縱觀因而圖之中間用力之難易費財之多寡固有不
同然皆各有緣合吾家自祖父以來貴顯百餘年未嘗以勢凌人
未嘗損人利己溪橋翁為地方廣行方便至今鄉里社而祀之參
議公當張文忠公為相保護善類搢紳推重載在志傳中可考也
予雖不能望先公然所至多為地方盡心務從仁厚或天亦緣此
以福吾家子孫務宜永念爾祖聿脩厥德庶為他日用地之基本
也
一佛寺神壇雖有好風水決不可聽術家言便欲圖謀蓋奪人之
有本為不義譬如人家有好風水意欲得之必須重價使其心肯

意從若欲強佔彼必告官或呪詛神佛雖無言其報應尤甚也予
少年時嘉靖年間有例告佃寺院鄉官多紛紛拆佔獨我先公分
毫不取江西豐城有李約齋公諱逢極精風水時以都掌科謫官
瑞安與先公極知厚數語先公曰白塔寺乃一枝正龍其地極盛
公可乘例告佃此子孫永久計也先公曰我為諸生時讀書此寺
因而起家即風水甚勝予不忍奪也後有力者亦欲毀此寺先公
力為保庇得免予兄弟嗣又漸資其修葺至今猶得全美者皆先
公力也諸家佔奪寺院者皆不見昌吉亦可為永鑒

温州郡龍融結大槩

郡城為晉郭景純所扞當時名為九斗城延山脊為斗間白路今
登城四望角俱有山而華蓋在東畔下手實為一郡之主而巽山
仁王覆釜俱在城外為斗柄引三溪之水由小南門進城匯於雁

| | | | | | | | | | | | |
|---|-------------------------------|---|---|---|---|---|---|---|---|---|---|
| 南 | 絕 | 處 | 山 | 轉 | 屏 | 穿 | 東 | 山 | 譙 | 寧 | 池 |
| 溪 | 鮮 | 故 | 壘 | 向 | 山 | 江 | 時 | 峰 | 樓 | 寺 | 過 |
| 兩 | <small>萬曆甲申歲余於良方築一塔以接</small> | 城 | 障 | 西 | 障 | 而 | 長 | 頂 | 一 | 前 | 府 |
| 大 | <small>續山龍斷處誠一郡城最得力處也</small> | 中 | 而 | 落 | 住 | 來 | 江 | 雖 | 望 | 海 | 治 |
| 江 | | 無 | 亦 | 頭 | 江 | 作 | 之 | 秀 | 九 | 壇 | 繞 |
| 界 | | 甚 | 可 | 是 | 流 | 郡 | 外 | 而 | 斗 | 山 | 城 |
| 送 | | 大 | 以 | 一 | 水 | 城 | 挂 | 山 | 環 | 邊 | 西 |
| 從 | | 家 | 發 | 大 | 口 | 水 | 綵 | 脚 | 繞 | 開 | 河 |
| 永 | | 巨 | 福 | 局 | 但 | 口 | 諸 | 反 | 四 | 一 | 纏 |
| 寧 | | 族 | 但 | 而 | 相 | 惜 | 峰 | 跳 | 面 | 水 | 轉 |
| 山 | | 即 | 龍 | 內 | 去 | 其 | 高 | 向 | 秀 | 門 | 倉 |
| 頂 | | 有 | 氣 | 河 | 頗 | 山 | 聳 | 上 | 麗 | 引 | 橋 |
| 一 | | 科 | 本 | 外 | 遠 | 低 | 如 | 賴 | 又 | 江 | 界 |
| 望 | | 第 | 弱 | 江 | 殊 | 小 | 插 | 有 | 得 | 流 | 住 |
| 兩 | | 皆 | 而 | 又 | 欠 | 而 | 戟 | 松 | 隔 | 與 | 來 |
| 邊 | | 係 | 良 | 纏 | 得 | 面 | 護 | 臺 | 江 | 河 | 龍 |
| 俱 | | 各 | 峰 | 其 | 力 | 又 | 垣 | 山 | 永 | 水 | 正 |
| 開 | | 鄉 | 不 | 後 | 所 | 向 | 而 | 遮 | 寧 | 會 | 脈 |
| 大 | | 僑 | 起 | 故 | 可 | 南 | 瞿 | 障 | 為 | 合 | 其 |
| 障 | | 居 | 下 | 水 | 取 | 雖 | 一 | 不 | 後 | 不 | 河 |
| 左 | | 者 | 手 | 口 | 者 | 有 | 山 | 甚 | 托 | 復 | 仍 |
| 翼 | | 而 | 又 | 雖 | 惟 | 茅 | 自 | 見 | 但 | 皆 | 向 |
| 至 | | 郡 | 多 | 無 | 此 | 竹 | 挂 | 其 | 右 | 淤 | 北 |
| 千 | | 城 | 空 | 重 | 龍 | 山 | 綵 | 反 | 邊 | 塞 | 過 |
| 石 | | 中 | 缺 | | 盤 | 南 | | 背 | 西 | 若 | 天 |
| | | | | | | | | | | 登 | |

江右翼至集頭用江心兩塔為羅星其中融結亦非小可也

龍母紀事

志載龍母本蒼山周姓一處子年未笄往溪頭汲水見一卵色甚
奇置口中誤吞而下遂懷孕其母疑其有私幽之別室中數月後
產白龍衝屋而出女驚死雲霧護其居里中震驚屢日大雨雹而
去里人因肖其像其所居後有崖洞奇絕遂置像洞中後遇旱禱
之輒應余所歷觀則嘉靖甲午歲夏秋數月不雨民心惶惶邑侯
應城石崖周公琚徒步拜禱未應用父老言遣邑丞詣蒼山迎龍
母甫出山雲霧夾護以行至江口白龍見江心寺後初設壇於開
元寺其供奉係周子姓云龍母不入城乃設廠於山川壇官屬朝
夕往祈拜時亢旱既久禾且就槁雨僅霏微下侯患之或言龍母
前有黑旗開之雨即至侯以詰供奉供奉曰開旗固可得雨恐風

驟起不可當所損匪細侯不聽曰如果得雨以救枯苗雖風狂何
害強開旗風果捲地而起屋瓦如飄葉府衛堂學宮開元寺及大
樹俱拔倒雨傾盆下未移時河水溢入城獨山川壇龍母所駐廠
房不動座前燭亦不滅由是人爭異之周侯紀其事於邑志中嗣
後遇旱一禱輒應里中周姓爭傳謂龍母每出及還山輒損一女
口必欲另塑一小像以厭之由是真偽混淆非供奉不能辨識且
崖洞深杳藤蔓障翳頗難入往迎官但得一像即出亦不復詳辨
故靈稍不逮前云

嘉靖甲子余令常熟亦有龍母祠考其志事與永嘉絕類乃國
初有宦吾鄉者見其靈異潛取以歸奉之虞山致道觀中因早
衆請禱於龍母白龍見城西尚河中雨遂沛自是亦屢禱屢應
成化間有鄉人瞿某官工部郎奏請建祠祀之
詔許可瞿率

有司建龍母祠於虞山之北據山之半制甚宏偉尙建齋宮守
之每春秋丁祭後一日縣官率衆先期詣齋宿致祭禮甚虔余
令虞時曾數詣焉後會鄉先生張禹山公言當時請建龍母祠
乃瞿昆湖公之祖公實龍母降祥張與昆湖公同癸卯鄉薦甲
辰同入會場出語張曰我自為諸生每遇試輒夢白龍入室必
得意昨夢白龍入我腹中場中七篇若有神助如後場俱若此
必奪魁無疑矣後屢夜果夢如前遂以會元及第張下第歸授
徒於虞山龍母祠尙間過祠讀其碑文備知建祠始末祠前有
一坊扁曰會景尙註成化甲辰年建因思昆湖公名景淳中甲
辰會元蓋預兆於此矣余嘗叩昆湖公與張言無異公狀甚短
小聲細微無鬚類一老嫗狀所謂龍母降祥或然也因併記之
永昌堡城門上梁文

漢書卷之九十四

伏以揆方設險國家重保障之功思患預防草野負干城之責顧
疆理雖屬於人謀而形勝實由於天造江山有待遠邇交歡暘谷
主人未際風雲素懷經濟憤倭奴之倡亂整義旅誓欲廓清憫鄉
族之流移建垣堡且圖安集豈惟保聚我宗祊實欲招徠乎庶姓
墉陴凡幾里據高深更藉人和水陸總八門通舟車共誇民便卜
焉允吉名曰永昌環海為池適攬朝宗之會倚山作鎮預占降嶽
之祥敢云人傑地靈惟願民康物阜層樓插漢雲間鷹隼驚飛粉
堞橫江水底魚龍爭避仗父兄之協力聿觀百雉告成幸黎庶之
同心快覩三冬底績永奠金湯之固坐銷郊壘之憂暫息斧斤聽
余祝頌

拋梁東旭日初升瑞靄紅直向扶桑標漢界島夷擊頸息狼烽
拋梁西喬木千章紫翠齊解道山靈新毓秀舊家門閱倍生輝

拋梁南天馬峰高與漢參最喜薰風能解愠滿城士女樂耕蠶
拋梁北睥睨臨江更生色雞犬無聲境晏然何用嚴局防暴客
拋梁上樓堞高懸凡幾丈咫尺丹霄手可攀挽取銀河洗腥瘴
拋梁下城中有地容車馬但願民居日衍蕃一區豈論千金價
伏以上梁之後山河益壯瀚海無波擅東起之奇觀作甌邦之巨
鎮時和序協雨露潤四面之窗櫺國泰民安星斗麗五更之鼓角
銷兵為耒耜何須寓兵於農倚檻課耕耘永願止戈為武百祥萃
止萬姓攸寧

玉輝堂上梁文

結廬在人境適當山水之奧區居第傳子孫幸倚名賢之勝蹟園
林增勝閭里交歡賜谷主人早謝簪纓金馬門久無夢到棲遲泉
石烟霞主自有天緣景隨處以維新園日涉以成趣居連華麓承

祐原本
祐

脩原本
脩

先^大人堂構宏規勝擅墨池踵右將軍風流餘韻密邇洞天福地真

為城市山林池館亭臺自喜足娛晚景蒸嘗燕享尚歎貽謀後人

爰卜吉於巽隅用作宮於離首樹德慚王祐敢云門植三槐榮壽

擬靈椿漫謂庭芳五桂日吉時良集羣工共成燕喜牆高宮廣拋

六偉聊戲兒童

拋梁東華蓋峰高閃碧空紅日曉參雲樹底輝輝青旭映簾櫳

拋梁西一帶雲山擁翠微天作松臺相對峙萬家烟火影離離

拋梁南九斗奇山半立參寶塔凌空當巽吉文星朝暮落前簷

拋梁北玄武兩江水交塞海壇蒼翠列橫屏江上羅浮有佳色

拋梁上仰觀河漢光相向空中樓閣倚雲開五更長聽天雞唱

拋梁下避喧東郭無車馬墨池秀水接龍頭四時花卉尤瀟灑

伏願上梁之後不震不騰松竹脩然苞茂爰居爰處山水增其高

深從今後且行樂三十餘年俟他時作香火萬千曆歲鴻圖先澤

燕翼後嗣

惇敘堂上梁文

伏以承家啟祚緒業紹於箕裘燕子貽孫規猷拓於堂構詎曰世
資攸藉亦惟先德是繩幸借勝於林泉式增榮於里閭曷主人
夙綜家學世忝科名伯仲趾美於後先奕葉揚聲於中外三吳節
制蚤賦歸來百里絃歌還看接武維華蓋甲斗山之秀而墨池應
文曲之墟先大夫卜築於斯我嗣續令居有托出門跬步因負郭
而為園種橘千頭兼斲苓以益壽棠棣之室孔邇桑梓之鄰可依
頃際革舊之期爰創更新之舉相觀布置悉倣前脩率作經營課
之後輩方市材以庀衆遂卜居而奏功甲第雲連指顧中翬飛鳥
革華堂日麗蟠結處松茂竹苞偕羣從以居趨於詩趨於禮一庭

茲

何殊同氣懷二人明發見於羹見於牆百年不負守成未敢擬于
公之門駟馬可容妄意謂王氏之廬三槐載植惟其塗墍茨丹牖
於前避燥濕暑寒座友羣松何煩珠履家收萬卷奚羨籛金從城
市以得山林處江湖不忘廊廟堂開畫錦滿牀簪笏爭輝社結耆
英四壁琴書改色彼清泉為勺太玉為鄰本擅寰區勝槩而挹華
以嘯迎旭以登足供食息燕游丘樊若獻其幽竒宅里獨占夫爽
塏漫侈奐輪樹一方之觀快聞祝頌合四境之懽拭覩升梁爭先
唱綵試贊羣工之力為申六偉之謠

梁之東龍葱太玉隱仙宮松桂滿庭槐蔭合緣知培植自先公
梁之南三溪水匯盡成潭引得祥源滋慶澤謾誇壽富與多男
梁之西秀擁陽湖竹樹齊夜半浮蓮來太乙長生有訣手親題
梁之北孤嶼中流開海國金錢布地起珠輪頓使江山增氣色

梁之上九天瑞靄光搖養星文正應海壇沙莫訝童謠歌出相
梁之下里巷謳歌樂王化欲令寒士足歡顏安得身為萬間厦
伏願上梁之後家綏天社人顯地靈怡杖履於常春被章逢於奕
世富貴福澤將以厚吾生長幼尊卑誰與為不善無習膏梁紈綺
益崇禮樂詩書孝於親忠於君稱達人於明德之後前以先後以
裕彰餘慶於積善之家竇桂王槐英才輩出荀龍薛鳳奇瑞攸徵
仁賢媿古循良沕穆還小鄒魯坐占耄期之至嬉游熙皞之長民
物同康鄉邦永泰

鎮寧樓上梁文代作

伏以百雉應天星紫邏空中浮日觀六鼇盤地軸金沙界上涌靈
臺揆方當玄武之墟諏日際朱明之候粵自右軍典郡擬卜吉於
青鳥郭璞定阡已徵祥於白鹿雄蟠九斗秀挹兩江顧形勢雖本

於天成而管領尚慳於人力某某世傳緇素蚤掇科名侍從金馬
門曾領晉公使節縮符山水郡漫尋內史高踪適四境之又安喜
百廢之具舉海波雖靖猶繕園於崇墉風氣攸鍾復經營乎宏構
爰有棲真者碩屬意形家既度地而庀材遂鳩工而指廩慮始協
衷於司牧樂成交鬯於民心固氣運之聿興亦江山之有待舉杯
邀皓魄爭誇近水樓臺揮塵淨妖氛愈固北門鎖鑰天際建霞標
於挂綵江心屹砥柱於中川綉塔珠林浮動丹青之表風帆沙鳥
參翔几席之前雨捲珠簾見山色恍在滕王閣上風吹玉笛聽梅
花却疑黃鶴樓中若乃組練飛揚輜軒萃止津亭出祖樓櫓觀兵
甲擁水犀陣列鏡中魚鳥纜牽彩鷁歌傳江上驪駒孰非鉅麗之
觀寔皆斯樓之助績垂宏遠櫛曰鎮寧胥慶羣黎聊陳六偉
拋梁東氛祲全銷海日紅萬里扶桑通禹貢千家絃管醉春風

拋梁西城闕秋聲靜鼓鼙已看安流無跋浪不煩牛渚照靈犀
拋梁南雲間文筆曉相參鳳起蛟騰同奮迅紫駟駟鬪驂驄
拋梁北隔江山色搖空碧仰睇銀河咫尺間九斗星辰朝紫極
拋梁上民樂太平元有象中天亭午日重輪八表風清廓氛瘴
拋梁下江上人家如罨畫已看斥鹵變桑田會見黃金土同價
伏願上梁之後氣象維新人文增舊登金步玉佇看里號鳴珂銷
甲攷戈會見關名靖海永奠上游之雄鎮鬱為南戒之偉觀夜月
胡牀仙吏做武昌之故事春光洛社耆英踵司馬之遺風五夜星
河天籟拂簷鳴寶鐸八窗風露潮音隔浦合漁歌五邑亨嘉千秋
寧謚

晉內史郭景純先生祭文

猗歟先生仙跡非常天文地理洞晰毫芒斗城肇建白鹿呈祥預

知千載人物繁昌東隅獨缺爰在良方意蓋有待識豈未詳杲形
家夙嗜久仰休光築宮補缺冀効微長勒碑塑像天市傳芳卜辰
奉置敬奠椒觴惟靈昭赫永奠此邦

玉介園存稿卷之十七

玉介園存稿卷之十八

永嘉王叔杲陽德著

雜著

築永昌堡始末

嘉靖壬子癸丑間寇突起海上初登瑞安東山焚劫遂趨黃巖甲
 寅乙卯大亂吳浙間吾鄉每春夏報警無虛日我季父仁山公倡
 義練習鄉兵會從弟東華以廣東兵備謝歸益從與其事白於道
 府遂號召各鄉眾至千餘人是時軍門初設官府並不治兵惟募
 閩中兵船駐劄要隘各鄉倚吾家鄉兵為重丙辰秋寇自寧台間
 遁走楠溪至千石取船渡江約有百餘人多半俱閩人遇兵船皆
 拱手而過至蒲洲值潮長遂舍舟登岸過茅竹嶺燒海山鍾秀坊
 遠近震駭捕一鄉人詰之曰我欲往梅頭取船下海聞二都王家

浙江通志卷之十八

有鄉兵若干人此去經二都否鄉人給之曰此必由之路王家父
子兵二千餘人正在練習寇懼遂趨龍灣時吾鄉倉卒聞報仁山
公終夜號召無一人至者至次日午後始稍稍來集寇將謀趨我
鄉而吾兵已會半路要擊我衆彼寡時生擒數十皆閩人也寇連
夜遁去事聞道府甚喜具申軍門大行犒賞鄉人率衆為賀遂倚
吾鄉為長城余獨憂之曰此幸而成功也使寇當時不為鄉人所
給徑趨吾鄉家屬不盡為虜乎且我衆彼寡故一擊即遁耳愚以
為欲保聚鄉族必須相地築一城以護其室廬然後練習鄉兵進
則可戰退則可守方為萬全之策衆皆以余迂且怯獨景暘姪偉
其說及戊午歲海上競傳寇將大舉欲先破我家鄉兵然後進圍
郡城余請季父入城懇告曰人傳今歲寇以萬計欲甘心於我我
鄉兵勢不可復增且烏合之徒安能以寡敵衆矧叔父年逾七十

何可復事軍旅願亟移家入城季父曰吾族居英橋五百餘年矣
鄉族以我故堅守其故土我若入城自為計則得矣其如宗族祠
墓何余曰智者當度勢而量力哲人宜知幾以保身杲向年請築
堡咸以為迂今安能以垂老之軀屏翰一方哉竟不聽四月初四
日相傳有寇船泊海山季父與東華弟揚兵梅頭以威之寇船乘
風潮猝至眾奔潰季父遂遇害東華潛往前岡山得一小舟他匿
時長公西華以兵部主事奉差東歸與余星馳至祖居時聲勢甚
急乃扶柩同家屬避居茅竹墳菴未幾賊進圍郡城余兄弟俱在
茅竹乃私厝靈柩於墓側攜家眷夜奔避山中時遍地皆寇兼以
鄉人道之深山窮谷無所不到余與長公逃匿各山七八日至仙
巖時族眾俱避寇海安所東華弟與袁兵備張參將在寧村猶欲
率敗殘鄉兵進解郡城之圍至金輿遇伏寇戰敗亦竟被害時族

衆在海安者不知余兩人去向尋至巖菴邀余入海安城時海安城甚危急且低陋難守所中官軍亦無固志余既間行至所城乃編次避寇居民分畫四隅巡守寇數突至用藥弩射殺數人遂不敢犯族衆知城守之安益悔不早聽築堡之議五月望前寇稍退余乘夜駕小舟至郡城及入鄉族衆日來請決築堡之議初議前臨下洋大河後盡上葉泱計費萬餘金余兩人各出銀二千其餘就城內田地并人口加派以足經費後衆議恐城空闊難守前面又妨橫塘橋舊居遂退入三十餘丈後面亦恐大空減去二十餘丈及將欲起工前銀一時俱無措余既許輟會試之行身任其事乃先捐金二千長公北上請乞鹽院處助亦共滿二千之數時族屬當殘破之後所科派田地銀兩皆不能辦願以其地求售者甚衆余既欲成大事不得不勉從之十月收割後雖勉強起工然衆

口紛紜皆謂事必難成余業許力任其事不得復顧惜凡拏定城址估計工料分給資費皆余以身任之畫城為十八號每號五十丈擇族之稍能事者督之余獨總其成至己未春事稍集所築城高未踰丈四月寇又突至一方居民盡逃竄時余在郡城遠近爭傳堡中所遺房屋燒燬已盡眾口嗷嗷余日夜不自安及寇退堡中絕無事蓋賊恐城中有伏皆遠望不敢輕入也於是眾志益堅工作愈奮至己未冬而城完設水陸城門各四詳在築堡記畧共費七千餘金強半皆余所輸也庚申三月醮城設慶成宴甫畢寇又適至遠近居民皆奔堡中無不歡欣鼓舞而防守之法已漸備咸恃以無恐辛酉夏寇又泊城居民趨避者愈眾余調度防守凡半月寇野無所掠遂潛引去時有忌者過杭流誦巡鹽袁御史中其說遣各府推官四人按查知其事曾經題請又不費官錢不勞民力其

蒞遂解及七月海上異風作凡沿海城垣城堞樓櫓掠倒殆盡余
督衆勉事修葺又費八百餘金顧余以一人總工作之繁當變故
之集其勞苦萬狀至今思之猶為寒心今居是堡者但知安享其
成豈知當時之苦心哉城既完適值從子蘊膺鄉薦既塞謫口且
慰羣情明年余登進士咸以為慶云
初未築城時余詳視此方形勢當坐山面海方為正局嘉靖壬寅
先公欲建大宗祠余主議坐西向東其規模已畧定及扞城余決
意東向而族衆猶紛紛阻撓初自英家橋至廟橋雖為一方通行
之路然闊止四尺餘上河兩岸侵塞闊不盈丈僅容一舟且沿路
皆坑廁夏月行人皆掩鼻而過余既主議向東當先闢南北通衢
適倭寇將沿河房屋俱燒去時族衆亦以余既獨任築城之役俱
聽調度不復阻撓余照依時價每用去地一分給價三兩大興工

關原本作
關門

開浚河道河闊以四丈為準階以一丈五尺為準坑百餘口每口
給銀五錢其所費又不下千金後人但知河道街衢開闊而不知
當時開拓勞費之艱如此也并附及之

沿海事宜

溫郡沿海一帶自平陽金鄉抵樂清蒲岐延亘三百餘里其間多
係淺塗潮到即退難以泊船其地皆泥淖不便登岸惟傍海之山
插入江中其下水深即巨艦可泊寇亦易於登劫沙埕為閩浙之
交鎮下關實為要隘然山之入海者僅有數處當時設金鄉衛反
在內地偵探稍遠以故近年擬於兩處仍設兵防然往年倭寇並
未嘗由此亦非甚要隘也瑞安則東山去縣治甚近嘉靖壬子倭
寇登劫起於此處今已設有兵船永瑞交界之間曰梅頭此山當
海潮之衝其奇有海口往年倭寇每每由此登岸國初立海安

所專為防此要隘顧相去十餘里及聞警調兵攔截寇已長驅內地矣今設有後營兵一枝背山立營居民築堡自固此處有一海口長百餘丈塞去海口防守更易前任蔣知縣已有成議而居民以捕魚泊船小利竟阻大計梅頭以此為界寧村馬道其上為龍灣山然已稍入內地從來未嘗入寇由寧村渡江為樂清黃華山為石馬畧為白沙嶺為蒲岐山此數處皆為要隘然俱設有水陸官兵要在整擗督察無容虛冒汛時戒嚴防守仍不必更議添設矣其他海上要隘俱有兵船防汛時諸將督兵船駐泊海山出洋哨探先聲遠播倭寇落膽矣可保無他虞也

水利事宜

甌郡環海阻山其地西南稍高而東北漸下諸山谿發源西南經絡原野間而注於東北沿江一帶故於要隘處設陡門以時蓄洩

築塘埭以捍羨盈去郡城二十餘里曰蒲州其地外江內河陂石
為塘名曰長埭延亘十里許高厚不踰數丈僅僅若衣帶外禦江
潮內蓄河水以資田水灌溉舟楫往來蓋永瑞二邑地方所利賴
者每十數年不免一潰潰則江潮內入河水立涸阻津涉而害禾
稼大為民病自隆慶二年迄今河水靡歲不滄埭靡歲不決雖賴
賢有司亟加修築然已不堪勞費訪求其故一則北山之路增高
為梗一則陡門之底積淤為障緣北山之西路名鮑洲地勢洿下
為水勢奔會處水驟漲輒由此灌溢入江而沿江故有徑路一帶
遇水發則行者病涉歷歲居民培土壅沙漸高至數尺自是一值
水潦輒為攔障遂匯而東衝激長埭埭故數壞此其害一也又陡
門原有平字水則刻於洲橋設老人視以啟閉每處編圩夫供其
役後漸裁去歷歲滋久失於疏濬陡門底下漸積污泥水失其就

下之勢因而汎濫滄沒此其害二也夫水之行地中猶血氣之周
流於一身順之則體平壅之則疾作今每歲修築塘埭費以不貲
僅足防膚表之患而不疏其淤塞則腹心之病固在也今莫若夷
鮑洲徑路濬陡門積淤查復舊役視水則以時啟閉即可永無患
矣

一查復陡門舊規舊時各陡門俱於均徭內編夫六名以時啟閉
又於地方擇有身家者一人為圩長以督之大洲橋柱刻有平
字水則水過則則啟板不及則則下板僉一老人專管水則以
報水利官水利官遣牌令圩長督夫啟閉後來因裁穴費編夫
盡行革去水則亦不復視而圩長皆棍徒謀充時常放水以便
罾魚又於陡門下底設死板以致淤泥漸漲今陡門數里之內
河身反高於內河阻水就下之勢今宜盡掣去死板乘秋冬水

簽原本作
簽

涸將近陡門數里河道開濬深闊以便去水仍查復舊規以時
啟閉不宜以少費而妨大計也

一查埭湫舊設埭湫俱分布長埭之中今因民居稠密恐水勢衝
激私行堵塞又埭湫年久出水處砌石久堅懼有蟻穴之潰所
當查復重為修治仍於地方簽一有身家人管理庶不致堙塞
也

一修減水閘往年因水勢暴漲曾議設減水閘四五路在新建地
方但當時不視水則閘口過高水已滄田而猶未嘗出閘口今
宜以低田為則改下數尺必須裹外砌石堅固以防衝激上設
一石板以便行人蓋水勢既分長埭永無奔潰之患即少費亦
不足恤也

一查鮑洲路道鮑洲地形甚低為眾水下海趨會之處但土人不

便往來時嘗修築又利於外漲塗田宜悉濬去蓋水勢就下外
高數寸則十里之上高數尺矣誠不可不時行查驗也

永昌堡地圖說

溫之龍自枯西駛至海而盡為永嘉場其支分於北為郡城分於
南為瑞安永嘉場雖僻在海隅實中出之幹也北為甌江南為飛
雲江兩江夾龍東匯於海而島嶼環列來龍壘嶂從西南降勢悉
為石岡散氣鋪陽而聚於二三都之間又適當海之首故溫之顯
仕巨室多產茲土先是居者皆狃於南向愚謂右山左海上壓下
空雖稍近內水非正局也余既倡築堡之議乃宅中向東坐山面
海天馬在南黃石在北大海帶環內河四繞雖蕞爾之區而一郡
山水總攬殆盡

溫州衛所及海防官制說

倍原本作陪

温州三衛九所温州衛在府城與府並建設衛所官軍若干員名
專一防守城池磐石衛在江北寧村蒲岐新城諸所隸之金鄉衛
在江南蒲門壯士沙園諸所隸之海安瑞安平陽三所則隸温州
衛我國家肇建之初遣信國公湯和按行海上經畧沿海各處
要隘設立防禦一時無暇詳審多於民居稍屯集之處原非要隘
築為城池設立官軍分管水路陸路巡哨等項民間田地起科徵
稅歲供官軍月糧承平日久悉為虛文官軍坐食民脂漫不知何
所事事及嘉靖甲寅乙卯歲倭寇突起海上官兵一無所用沿海
衛所城池相去要隘頗遠一時號召不前於是再議募兵詳酌要
隘去後設立寨柵防守又於民間田上科派練兵銀兩以給兵餉
視官兵月糧不啻倍之而督兵諸將又選民間稍知兵事者充為
名色把總世官指揮千百戶等間一選用迄今四十餘年海上不

關原本
門

免時有警報募兵既不敢輕議遽撤而衛所官兵盡為虛設此誠
東南之大弊也又當時初設官軍行伍悉充而民間所徵糧額算
足供給外官軍消耗將半而民間糧額猶然不減悉為奸胥侵漁
近始議查追餘糧以充運軍之需然實非法紀也
溫處兩府嘉靖以前止設欽依守備一員駐劄處州專為防礦溫
州海上上設委總一員惟海上諸衛所隸之甲寅乙卯歲倭起乃
移處州守備為欽總於磐石黃花等處駐劄又以南北兩海口相
去三百餘里照應不及仍添設委總一員南北分管嘉靖戊午倭
勢滋橫兵道難以獨肩始建議設參將一員駐劄磐石衛與兵道
表裏相照應欽總移駐瑞安以控制南港金鄉等處其南北要隘
如黃花蒲岐石馬梅頭飛雲鎮下關等處俱設名色把總帶領水
陸官兵防汛大約每一處不分水陸俱設兵五百名此皆以募兵

充之也

元城書院延師移文

竊惟學校為賢士所關而師儒係聖化之本故文翁治蜀郡首建學宮而安定教蘇湖齋名治事誠欲先時以儲蓄乃可應期以効用也本府勢臨河北地列畿南雖瞻依日月之光非無名世以需家國之用而牽泥見聞之陋每徵實學以成博大之材且學舍荒頽生儒苦於即次而橋門堙圯小大何以從觀士氣所以不伸人文因而未振本職深惟廢墜之懼竊為改作之圖新廟廡以妥聖賢之神靈飭堂齋以便師生之居肄仍舊規而稍加開拓革故陋而咸與維新足以壯一郡之雄瞻來諸生之類聚矣但學以立教為本而教必得師乃成苟非師嚴而道尊安望功崇而業進照得長垣縣儒學署教諭事吳欽早掇巍科夙馳士望德行守先王之

書

道規圓矩方文章挽後進之衰家傳人誦似茲出類豪傑雖海內
亦不常逢今者握印儒宮在河朔實為多幸且本府尚遺忠定芳
聲舊有元城舊院齋垣如故寬敞可容合無禮聘本官延居師席
合郡中之年資可進者而羣業其中取屬邑之志向可嘉者而皆
與其進萃一堂而雨化雖未必泝流於洙泗之源偕多士以雲從
或可嗣響於白鹿之洞學校修而人文振佇看麟鳳翱翔師道立
而善人多會見蛟龍變化可以上贊文明之治仰成樂育之懷矣
詳刻大名府賦役總冊
照得本府所屬十一州縣地畝人丁各有定數應編賦役亦有成
規但沿革定於隨時而輕重無據編派仍於往日而劑量失宜且
案牘浩繁官吏數易以故積書得以為奸而所司莫能究詰甚或
留餘丁以便饕餮之輩行私派而邀節省之名上下相蒙因循成

及原亦作
乃

習官既墮其欺而民重受其困矣本府竊念民瘼細究弊端輒欲
編輯成書以便稽考乃吊取各州縣賦役款目量其繁簡之異酌
為增損之宜固欲務於撙節以舒民力然亦不敢過於裁減以病
所司凡出於國用之所必需民力之所必供者盡數編派分為四
項類成總冊先之以稅糧次之以馬政又次之以均徭又次之以
里甲雖不係丁糧攤派者亦并附焉括之凡例以揭其要申之禁
令以峻其防列之前件以詳其故有府總以備各州縣之分派有
散冊以載各州縣之實徵刊刻成書永為規則使民皆家喻而戶
曉官可一覽而周知如有額外加徵及仍前私派等項查出俱以
贓論庶催科有定額而可以革吏書之奸輸納有常規而可以蘇
民力之困矣

稅糧

養法

夫則壤成賦者王政之經也大名之屬十有一其地饒瘠相半賦亦稍有等差邇年漳衛汎漲變更靡常已非昔日之舊舊額夏秋稅糧一十四萬七千有奇馬草一百八十六萬九千有奇其折解徵銀屢有加損自三十二年以迄於今加徵銀至一萬一千三十兩有奇今總為銀二十二萬矣每歲計部坐派倉口靡常總其數下之府府下之州州邑州邑驗派之細民細民之不敢質之於邑猶邑之不敢質之於府府之不敢質之於計部也胥徒里役因緣為奸雖善計者莫能稽其弊而況以數易之長吏田野之愚民曷從而考其故乎是故刊定賦總巨細悉載庶展卷在目而家喻戶曉矣

馬政

國初驗地分卷種馬孳駒俵解其清至良後因回寺題請馬有定

式而所孳駒多不堪俵解遂變而徵銀本色每匹三十兩折色每
匹二十四兩本色既非本地所產馬販趨利遠來乘機勒價馬戶
甚苦之近雖立法當書驗馬定價稍除高勒之弊然馬戶俵解中
途喂養之艱交納支費之累間有驗退另買倒死賠償每每有至
破產者故近畿之民最苦此役職嘗至邊關見寄養之馬既非牝
騾而委之邊軍砂礫之墟苦寒之地風土不宜水草不服不過歲
餘悉以倒死故議者往往以折色為公私兩利或地方稍值荒歉
則就中調停三七四六均派然種馬以減半則本折自當因之而
議者猶未及邇來邊徼寧晏通徵折色此方之困庶幾其稍甦矣
均徭

上供之需力役之征祭祀之式公家之所不可廢也此均徭所由
肇矣夫所設均徭者以均其徭役也而銀差力差輕重殊異何以

示均大名均徭為一條鞭之法每三年一審固以消長靡常隨時
伸縮銀差槩編之齊民力差量派之富室似亦得通變之術矣然
審編定則陞擦加詳固已較然有等乃銀差止正數而力差顧有
二倍三倍以至四倍者不幾於偏重乎故議力差亦量加編正銀
為一倍之法更定審編酌處之規嚴餘丁私派之禁庶小民樂於
從輕而富民不至於重累矣

里甲

古稱有田則有租有身則有庸今之稅徵於地徭起於丁民之上
供備矣而復有所謂里甲丁糧者公費之不足又從而益之此丁
糧之所由起固均徭之別名也然均徭三年一審槩邑通編里甲
十年一輪十甲第及通編者雖輕而患於頻第及者雖疎而苦於
重苟不詳其節目嚴其科條脫或有橫征之吏何以禦之前院刊

經原
往本
作

詳丁糧事宜列為額支待支雜支三項其慮至周而其法良亦備矣獨於役支夫馬則未之及大名素稱僻郡無驛遞之設邇來趙晉齊秦之轍悉經於此焉而幾成孔道矣故屬邑夫馬之費居丁糧十之八裁之則供應乏增之則民力疲近奉撫院酌議就中調停俾輳集有需佔濫悉屏視昔較省然槩之皆非惟正之供也嗟乎公家之取於民者已蔑不至矣長民者遵其成式猶思有以裁之若復為額外之征是豈復有人心者哉

議豁大名府一州十縣馬地餘銀

看得大名府所屬開州并元城等十縣洪武年間原額地土俱止照畝徵糧永樂初年始以人丁養馬弘治八年因人丁養馬貧富不均蒙本府李某奏奉 欽依改為論地養馬免馬一匹定地五十畝騾馬一匹定地一百畝將原額地畝一半養馬免糧一半徵

糧免馬彼時原無坐落條段分為二處可以丈勘後因百畝五十
畝之入不足以供養馬解俵之用至弘治十二年據南樂縣申蒙
巡按張御史詳允將各州縣折半養馬餘剩地畝不論沙灘瘠薄
盡數幫貼養馬於是民困少蘇正德年間流賊生發調征缺馬彼
時撫按倉皇無湊議將前項幫貼養馬地土每畝徵銀二分買馬
騎征止為一時權宜之計而餘地征銀之禍始自茲起正德十六
年詔順德府內丘縣民吳聰奏行巡按李將該府餘地查勘明白
奏請除豁而大名府獨未蠲免嘉靖元年奉例丈地均稅糧馬通
融一槩起科則徵糧之地無不養馬養馬之地無不徵糧原無餘
地遺在民間別坵另段為空閒之土可以計畝而徵銀者也雖節
奉行催未有分釐派徵至嘉靖十六年蒙兵部題委太僕寺孫寺
丞親詣本府丈勘前地本官明知原無額定條段可以丈量亦知

樵

通融養馬徵糧但以原係本寺錢糧不肯除豁止照百畝五十畝
 之外俱作餘地虛作文量名色造冊回報以致部寺信為真有餘
 地丈量是實餘銀未蒙除免迄今猶為逋負行催嘉靖十七年該
 廣平府曲周等縣民常寶等奏行太僕寺委江寺丞將該府餘地
 勘明回報至今停免今蒙委會同覆勘得本府所屬原額地畝凡
 尺土寸坵俱經委官丈量明白通融起科一例養馬徵糧分外再
 無毫釐餘地其加派前項養馬餘地銀兩委出額外況順廣二府
 已將前銀辯豁獨本府未蒙蠲除合無轉達題請除豁
 種馬餘地之發種禍於地方舊矣往年鄧西張公謙曾申白兩
 院具題而本兵未經題覆乃刊詳其始末一冊今又越二十餘
 年矣部寺之牒屢下計所徵不下數十萬郡縣雖無以應之萬
 一一旦橫征魏民即摧髓莫能供也今歲撫院慄菴宋公巡院

并上... 嘉... 卷... 第... 頁...

宜
原
本
作
可

念山羅公既允監司勘牒業已許具題某於故牒中檢張公舊
冊申請適大冢宰虞坡楊翁召掌大司馬某迎謁邯鄲道上持
張所刊冊呈覽翁亟荅云此地方公事我當促撫院會題疏至
即為具覆翁至部未踰月已奉旨悉免徵矣夫斯害之在兩
郡自正德以迄於今司民牧者未嘗不汲汲焉圖之然雖難於
兩院之允題而尤難於本兵之具覆今撫按慨然允行而虞翁
又適逢其會數十年禍本一旦遽撥甚矣三翁之有大造於魏
人也然虞翁之所造福海內者又豈止魏人已哉恐案久遺滅
因取前疏刻之漫附數語如左
詳刻大名府保甲鄉約
照得保甲鄉約所以弭盜化民實相表裏不宜偏廢者也立保甲
而不行鄉約有司固無以為倡率之機行鄉約而不遵家禮小民

亦無以為持循之具邇來保甲雖已申飭而鄉約向未舉行至於家禮尤此方缺然而未講者大名即古衛國乃先聖過化之區賢哲代產之地顧時移世遠地變風漓民性椎樸雖存而俗習慆淫益甚蓋緣淪胥於亂華之後漸漬於習染之深賢者安於故常不肖者樂於恣縱以故敗常亂俗悖禮傷化之事恬不為怪職嘗謂盜賊之未屏跡固可惡而民心之久陷溺尤可憫故既立保甲以厲其禁而又立鄉約以防其情申明家禮以祛其陋刊刻成書頒布州縣務令着實舉行雖未必挽回淳古之風或可少變冥頑之習僭以所刻二書上呈台覽更乞憲語叮嚀嚴加申飭庶得速於郵傳而風行於草偃矣

鄉約告示

大名府為申明鄉約以敦風化事照得彰善癉惡必先於教而化

民成俗恒始於鄉所以古有鄉約之設誠以上之人不能家喻戶
曉而令鄉之人互相勸諭所以化愚民廣德意法莫善焉者也但
倡導者無真心而奉行者無實意或虛應故事勞而無功或振刷
一時久而廢玩以故每視為靡文而迄無成效也本府受命來
守是邦觀風問俗雖存樸茂質直之遺猶多暴悍頑悖之習思所
以易俗移風舍鄉約不可也乃刊刻成書頒行州縣先以事宜數
條繼演聖諭六款載律法使民知懲列報應示民知勸至於俗
習移人漸漬罔覺故揭弊禁於鄉約之終雖條約說文大都襲舊
而刪繁就簡期在必行爾諸屬其體念此心着實脩舉爾士民其
查照原約着實遵行毋口應而心違毋始勤而終怠其所刊家禮
要節須請宦族士人之家率先以為民倡庶可以挽冥頑之俗成
仁讓之風而於國家設官為民之意或報稱於萬一云耳凡我同

事其共成之故諭

社倉事宜

直隸大名府為設社倉以備荒歉事照得積貯為生民大命救荒乃王政所先苟非預備於平時何以濟變於歉歲北郡多不事積貯本府於鄉約禁令多方勸諭而富民卒鮮有從者乃令各州縣村鎮多勸社倉刷本府之罪贖積徵收之羨餘蠲大戶之差役悉令輸穀行之三年民力既舒而所積穀至十餘萬不幸而遇歉年庶幾獲濟萬一其積貯發賑事宜相應開列以便遵守

詳擬江南海防事宜計二十一條

一看得江南海防事體重大當嘉靖三十二年倭寇生發擾內地選將練兵歲費糧餉百數十萬兩久乃底定猶且養兵徵餉戒嚴如故自議革兵減餉以來每年兵船裁縮姑存故事經費

海防卷之五

疎畧兵威積弱以致言官論列廟堂軫念今將兵馬錢糧通行酌議所有各項事理若不備列條規頒布守令將領共相遵照非所以處職守而明畫一也

一江南海防自有倭患以來設將屯兵造船徵餉經今二十餘年顧兵額之分布增減隨時而糧餉之徵給盈縮靡定即今海警雖幸暫寧而島夷猶懷窺伺飭兵備以固海防稽軍實以節民力誠不可一日弛者今閱視沿海一帶細察鎮堡隘塞之險夷以定兵防之緩急隨覈戰艦器械之堅瑕以辯節年之利弊水兵則分臨汎畢汎以劑量其等差陸兵則定合營屯操以振作其聲勢分布務極周詳供輸悉裁冗濫已經會題奉有欽依外然不立定章程則不惟後來者無所考鏡即今當事者亦無從稽查悉取各該要隘分布之成規參之以近日試驗之方畧

與夫四府水陸官兵供餉船隻器械修造數目備造一冊定為江南軍務章程先之以總論條約俾衆知所原委次之以兵餉船械使下有所考覈而兵餉之數則又總之以四府之大綱又析之以各營之細目其各縣徃編民壯及腹裏防守者亦併附焉庶一覽皆可周知各鎮可以坐照矣

一備倭之策莫先於邀擊海上自有倭寇以來各要隘俱設有兵船以防衝突以後寇勢稍靖始有上班下班之議每當汛期募集船兵聽總兵官量行調撥外洋巡邏其餘盡分布汛地及往來會哨然福蒼船釘稀板薄悉皆潛泊沙岸卒遇有警不能出洋沙槳船自一調遣之後俱各潛回私家海沙渺遠無所稽查悉為虛套議將舊時福蒼船盡行刪革另造堅厚者四十隻該總兵官建議設立號票更番互換往來汛地雖宿弊稍釐然終

游哨把總萬曆三年會議題允用福蒼船二十隻為母船沙船

| | | | | | | | | | | | | | | | | | | | | | | | | |
|---|---|---|---|---|---|---|---|---|---|---|---|---|---|---|---|---|---|---|---|---|---|---|---|---|
| 一 | 游 | 哨 | 把 | 總 | 萬 | 曆 | 三 | 年 | 會 | 議 | 題 | 允 | 用 | 福 | 蒼 | 船 | 二 | 十 | 隻 | 為 | 母 | 船 | 沙 | 船 |
| | 每 | 總 | 止 | 留 | 兵 | 船 | 一 | 哨 | 選 | 委 | 哨 | 官 | 一 | 員 | 統 | 領 | 防 | 守 | 港 | 口 | | | | |
| | 一 | 突 | 入 | 仍 | 合 | 踪 | 追 | 擊 | 截 | 其 | 歸 | 路 | 往 | 時 | 分 | 布 | 汛 | 地 | 俱 | 不 | 必 | 襲 | 故 | 套 |
| | 船 | 勢 | 盛 | 游 | 擊 | 率 | 領 | 本 | 部 | 及 | 崇 | 明 | 吳 | 淞 | 二 | 總 | 兵 | 船 | 為 | 游 | 哨 | 聲 | 援 | 萬 |
| | 下 | 脚 | 劉 | 河 | 兵 | 船 | 專 | 泊 | 宋 | 倍 | 嘴 | 吳 | 淞 | 兵 | 船 | 專 | 泊 | 竹 | 箔 | 沙 | 若 | 外 | 洋 | 倭 |
| | 遣 | 其 | 中 | 軍 | 所 | 領 | 船 | 兵 | 亦 | 掣 | 入 | 游 | 哨 | 崇 | 明 | 兵 | 船 | 分 | 泊 | 三 | 沙 | 洪 | 三 | 沙 |
| | 州 | 門 | 戶 | 船 | 兵 | 照 | 舊 | 存 | 留 | 吳 | 淞 | 係 | 總 | 鎮 | 之 | 所 | 留 | 把 | 總 | 一 | 枝 | 以 | 聽 | 調 |
| | 撤 | 去 | 以 | 充 | 僱 | 募 | 游 | 哨 | 兵 | 船 | 用 | 費 | 惟 | 崇 | 明 | 當 | 海 | 洋 | 要 | 衝 | 劉 | 河 | 為 | 蘇 |
| | 汛 | 兵 | 船 | 可 | 省 | 惟 | 留 | 原 | 議 | 常 | 川 | 沙 | 槩 | 船 | 專 | 一 | 巡 | 緝 | 盜 | 其 | 餘 | 悉 | 行 | |
| | 外 | 洋 | 自 | 狼 | 福 | 以 | 上 | 白 | 茆 | 福 | 山 | 楊 | 舍 | 江 | 陰 | 孟 | 河 | 等 | 處 | 皆 | 入 | 內 | 港 | 防 |
| | 錢 | 許 | 以 | 下 | 伺 | 寇 | 初 | 至 | 邀 | 擊 | 遂 | 收 | 全 | 功 | 添 | 設 | 游 | 哨 | 把 | 總 | 專 | 務 | 邀 | 擊 |
| | 年 | 泊 | 守 | 亦 | 鮮 | 實 | 用 | 萬 | 曆 | 二 | 年 | 摘 | 發 | 一 | 枝 | 選 | 委 | 慣 | 海 | 官 | 專 | 在 | 洋 | 山 |

四十隻專備調遣犁擊唬船四十隻裝帶火器專便追逐選委
慣海名色哨官六員統領其福蒼船兵夫照依舊規上班下班
增減人數沙船照依近議加增雇值汛畢盡行歇班唬船俱係
定海慣海漁人難以遣歸今議汛時專在外洋擊倭汛畢分布
江上二十隻內河二十隻仍令把總官帶領哨官督察各港兵
船巡緝鹽盜

一游哨兵船專務外洋遠邇然必須預擇勝地先據島嶼安泊母
船以固營寨然後分撥沙唬等船四出游哨相其賊勢多寡為
我攻勦之緩急蓋倭寇衝冒風濤而來昏瞶未定而我出奇兵
以扼之所謂以逸待勞可以百戰百勝若容彼先得島奧停泊
是反客而為主矣故游哨兵船不可與內港者例視其修艤當
預糧餉當先遣發當早遲則東南風汛母船不便即行必須先

據島壘以便棲泊如全班三月初一日上哨六月初一日收哨
游哨二月二十五日先發五月二十五日先收那後趨前總以
三月為度其兵糧俱該預提解過太倉州收貯以便支給有司
如違期不解者定行提究

一

海防事理不過水陸二端每歲禦倭之策固當截之於海尤當
備之於陸自金山迤北以西至圖山連亘八百餘里凡要隘處
俱各設有陸兵往時聽其自為操練全無節制雖有總副參游
亦各自為體統不行合營團操把總以下亦皆循常襲故不免
偷安虛冒兵政乖錯軍聲廢怠已非一日近議請更將增兵合
營屯操仍照附近列為四營柘林青村兵合金山參將為一大
營川沙南匯寶鎮堡合吳淞陸兵把總為一大營劉河游擊部
下兵本道太倉親兵為一大營孟河江陰合楊舍守備為一大

營時常會合操練副總兵官不時行營督察務令將士不敢偷安兵勢相為聯絡遇當汛時分布防守互相策應兩年以來行伍改觀旌旗生色查得福山以至京圖所設官兵備鹽盜之日多備倭寇之日少考其責任止司守衛其口糧自應遵舊自寶鎮以至金山一望大海並無港壘可泊舟師相對羊山一潮可及倭寇突來惟賴陸兵接戰非得精勇之兵何以備禦其口糧一例三分務要人人精勇可以出戰不許色收疲弱致累行伍各該將官著實舉行稍有不稱定以不職坐論

一吳淞總兵陸營原設民兵一千三百二員名挑選軍舍餘丁五百名共一千八百二員名合營操練今該本鎮查有膂力不堪軍兵一百六十名革回守城實存軍民兵一千六百四十二名其舊設唬船一十隻每船兵十八名上年選委慣出海官汛時

一
統領出哨羊許大小七馬蹟陳錢等山哨擊今既立游哨仍於
春汛委官統領隨哨征勦汛畢仍歸陸營操練以備緩急調遣
一金山衛大海襟其南松江在其北東為青南之上游西為乍獨
之界限查閱城池空虛防守單薄建議題請改編軍伍填實衛
城仍移改蘇松參將駐劄該鎮原有民兵五百六十名選鋒軍
餘五百六十名共成二營塘健牙兵等役四十名俱聽參將統
領又選委慣戰總練官一員哨官千百戶五員常川與柘林青
村兵合營屯操東至吳淞寶鎮西至乍浦獨山北抵松江迤北
一帶遇有警息往來截殺添設唬船八隻以資探報其金山衛
所并各城堡把總指揮等官軍兵舍餘悉聽調度如有應援失
期觀望誤事照依軍法從重究治一應守城巡哨事宜俱照舊
規酌量編派但兵家之勢要在虛實罔測分合隨宜戰守互用

訊原本作
信

議得南匯當海勢之衝為吳淞金山適中要地倭寇往往在此
登犯議每歲汛期總參二營各挑精兵一枝赴南匯駐劄分伏
海塘遇有倭寇登岸即時奮勇勦滅萬一金兵有警則回兵掩
襲內外夾攻斯為折衝制勝要該本道措處官銀蓋造營房一
百五十餘間防守之計可謂全備矣
一柘林總自滄港起至橫林墩止皆其訊地該總原有民兵四百
名戰馬二十四匹近復議得該堡兵力單弱加募民兵一百六
十名共足五百六十名為一營督同哨官管領訓練仍聽蘇松
參將合營團操又看得其地險要已行修理營房汛時參將帶
兵往來駐劄添設唬船四隻以資探報其貼駕軍兵於青村所
選補附近戚木陶宅二巡司弓兵八十名合聽該總調度合營
操練有警則併力截殺汛畢聽各照舊巡緝其本堡官軍併金

新上... 卷五... 吳淞金山...

治平卷之五 勇臣後車 卷之五 治平卷之五

山青村每處俱照舊規撥兵晝夜往來巡哨有警飛報總兵參將青南等處互相應援不得各分彼此致誤機宜

一青村南匯實為沿海要區倭寇首犯之處舊時各設把總一員統領重兵防禦後海警既寧當事者不熟察其形勢遽議裁革而以青村屬之柘林總南匯屬之川沙總僅留民兵百名軍兵二百名各委本所千戶統領其民兵悉係勢豪家奴掛名冒餉千戶職卑莫能制伏而軍兵又為二總調取守堡反致要隘空虛本道會同總兵衙門看得青南軍兵類多驍勇先年首挫倭鋒近日又殲突寇屢經試驗各將前項民兵百名盡行汰革省其工食加選軍兵三百以足五百之數選委慣戰將官一員訓練專備本地戰守俱屬參將提調川柘二總止照舊各統本部之兵非遇十分警急不許掣守堡城以蹈顧彼失此之弊其青

村汛地自胡家港起至翁家港止南匯汛地自翁家港起至五
圍止各自防守仍照舊規每處撥軍五十名不分晝夜往來會
哨沿海墩臺該所掌印官每處選撥軍餘五名帶馬一匹住守
瞭望遇警飛報總兵參將柘林等處以便策應
一川沙把總自六團起至寶鎮堡止皆其汛地境屬有南匯所南
踰三林二巡司沿海地方百里俱係衝要舊設民兵四百名戰
馬二十四匹近會議該總兵力單弱加募民兵一百六十名共
足五百六十名為一營督同哨官二員管領訓練時常與總鎮
營兵合營團操該堡孤懸海邊而川沙窪水深岸近今議總兵
官分兵巡劄則往來必經南匯其策應川沙尤便又添設哨探
唬船四隻船兵即於陸兵內扣充仍查照金山例行貼駕軍餘
於南匯所選補本所千戶帶領軍餘一百名守堡與寶鎮堡每

海防志卷之五 兵備

處各撥兵一百名往來會哨有警飛報總兵參將南匯寶鎮堡并上海縣相為犄角互相聲援其巡司弓兵并南匯官軍悉聽該總隨宜調度

一青柘南川達於寶鎮延袤二百五十餘里一望平陸隨處可登其川沙窪水深丈餘翁家港雖淺然潮漲即可泊岸二港最係危急各該汛地雖設兵往來巡哨第恐風雨晦冥之時巡兵各歸汛地而二處港口萬一有警誤事匪輕舊規南匯撥兵五十名委官一員帶領專守川沙窪青村撥兵五十名委官一員帶領專守翁家港俱聽委官約束委官聽該總約束遇警馳報各路官兵合勦每年春汛依期巡撥汛畢歇班一寶鎮堡南自徐家溝起北至老鸛嘴止一帶俱為險要且寶山突然為海上標識倭舶乘風雨來勢必趨此雖去吳淞大營不

遠然阻隔黃浦聞警調兵卒難濟渡舊時春汛於總兵標下分
撥陸兵二百名加募民兵一百名委指揮一員統領防守然城
堡窄狹又失地形兵力單弱甚為可虞今議題請改築堡城三
里併環吳淞協守所官軍移守新城山上加築墩臺以便瞭望
以壯聲勢仍建造官廳營房每汛時總兵官帶陸兵駐劄城內
屹然為一方巨鎮不惟要隘有備且南匯青村一帶接應更便
汛畢各兵仍回總鎮合營團操餘候部咨至日施行
一福山楊舍等處居狼福之上已入內地海警既寧惟以捕緝盜
盜為務其防汛船兵俱已撤去原設參將已更置守備事體稍
便福山陸軍一百名止備把總官調遣守堡楊舍原設陸兵五
百名近議本堡非係要隘及查孟河一帶鹽盜充斥止有民壯
七十名不充緝捕議該題請將本堡陸兵行令守備分撥二百

治平卷之五 兵部 兵部 兵部

名協守近因孟河等處守禦既嚴盜轉集魏村今議掣孟河
陸兵一百名專委哨官一員領駐閘上仍督同各巡司官兵地
方保甲長遇有盜賊竊發即便緝捕俱聽守備官調度不時往
來合營操練

一新設游哨兵船議聯浙直合勤但查倭寇之來必由陳錢等處
入犯我直舟師欲邀擊外洋必趨聖姑蒲裏等處而浙鎮兵船
亦必由此駐泊若或彼此不聯氣合心未免對舟為敵國矣又
或倭寇突犯利在相時料敵不可逗遛誤事若或兩軍相持恐
彼此分功或至失機為害叵測今後我兵往彼會哨各宜同心
歃血盟誓務期合勢共濟不可爭功相競如敢故違約束雖有
功亦當後論其奪功生事之人從實究明定以軍法從事決不
輕貸

一議處糧餉查得江南倭患起於嘉靖三十二年承平既久民不知兵所至官兵不敵倭勢猖獗百姓被害日甚朝廷選將練兵前後費用以數百萬計然後底定除初年兵餉不查外嘉靖四十年以後歲計四十餘萬至四十五年該撫院謝看得倭患稍息乃議減留二十萬隆慶初年該撫院海盡欲議革隨該戶部量留五萬尋增至八萬然海防重大兵難撤減三四年間當事者計無所出乃括查府衛存留等項東挪西補每歲約費餉銀十一萬有奇人情喜於襲故官司緩於遠慮以行伍則彼此支吾僅存人數以船隻則釘稀板薄無益出洋火器衣甲吏胥奸棍包攬侵騙歲造月支並無查考兵防廢弛莫甚此時正值言官論列本兵移咨申飭深以江南兵力單弱為憂隨行該鎮等官會同查議又該巡歷所致備相咨度乃始條陳五事

海防卷之五 勇臣督軍 卷之五

稍加振飭如議餉一節原額餉銀八萬兩取給蘇松常鎮及應
 安等府協濟一應在內併將蘇州派剩料價蘆蕩畝價各衛扣
 存軍儲湊補僅足支持又查往年倭寇初起蘇松四府隨地被
 擾隨處置將以故四府坐派各計兵費以為多寡在蘇則每糧
 一石連撮取料價等銀計該銀一分九釐松則每平米一石派
 銀二分有零常則每米一石不過一分四釐五毫此餘彼小此
 重彼輕揆之事體殊久妥當今看得防海機宜無分內外經費
 糧餉無分彼此若據海而言則專在松江內地郡縣果可坐視
 乎查得鎮江一府地界長江每年操江衙門議給兵費原分派
 四府共該七千兩有零今盡免併鎮江專管江防外其海防銀
 兩合行蘇松常三府一體均派萬曆二年議派每糧一石銀一
 分五厘有零通計蘇州撥剩等銀及各衛扣存軍儲協濟等銀

計該餉銀一十三萬一千二百四十一兩有零萬曆三年五月
倭奴忽犯海上全賴改造船隻增調游兵徑抵陳錢等處截殺
已收全功汎畢隨該本道及鎮守官復將防守事宜條陳前來
內開查處糧餉一節既經三府會議均派所有蘇州蕩價銀五
千五百兩應還該府以備織造又該經畧江防該徵寧道呈議
要將海防銀二萬三千六百兩取回以備江防已經三道會議
量撥回五千兩其餘仍留協濟通濟續議該兵餉銀一十三萬
九千六百三十八兩有奇除協濟軍儲扣存併扣留民壯各項
銀兩外蘇松常三府實該派銀九萬七千二百三十四兩每糧
一石的派銀二分永為定例所有細數俱載款目內嗟乎江南
民力竭矣前後陳乞費竭心力不可殫述所據派數比之閩浙
未能半之因備載始末以見一時苦心云

一各屬練兵餉銀每年款入會計坐派條編隨糧徵收以供水陸
官兵口糧修船置械犒賞等費掌印管糧官務要嚴行隨期徵
完陸續給批赴本道掛號其銀查照分派徑自解各府及太倉
州查收貯庫聽候支用每月各府州將收到銀數具揭報
道每月通查具揭報院定限次年二月終盡數完足如或各掌
印官不行依期完解即牌委海防同知臨縣比催近奉明旨
每年防汛畢日類有舉劾違限不行完報掌印官聽候參究管
糧官先行提問

一預汎朱查得沿海城堡不通商賈每年春汎本道議行蘇州府
派買汎米三千石內解吳淞所一千石劉河堡一千石福山堡
一千石松江府派買汎米五千石內解吳淞金山柘林川沙各
一千石青南二處各五百石常州府派買汎米一千五百石內

解揚舍一千石孟河五百石委官驗收完足專備防汛支用汛
畢無警照依時價給抵兵餉奈法久弊生前項汛米不行依期
解足延至汛畢希圖倖免萬一有警將何支應已嚴行各州縣
責將原派汛米限在正月中旬解至各該城堡收貯備禦通取
實收繳查如過期不完即將誤事員役以軍法治罪庶人心知
警邊儲充實矣

一每年終造報查盤文冊一件如支用過兵糧賞犒打造過船隻
器械各項餉銀及給發過各項器械火藥數目各將領交納過
還官損壞器械或應修理或應改造或不堪回用等項俱要備
造舊管新收開除實在一樣四本一本呈院一本存道一本各
府州縣海防館備照如遇查盤一揭了然俱照查造報解每每
過期皆緣掌印海防官不肯用心聽憑吏書推調遲誤是何法

紀自後嚴行海防館每月一造呈報到道輒行覆查相同候至
年終依期造報方今法度修明本道均有飭法之責不得循常
姑息有乖事理各海防館仍前怠延本道惟知有法耳念之念
之
一明賞格照得官兵獲功陞賞題有明例但摧鋒陷陣乃一時
激勸之權是不可以常例拘也今後陸戰賊勢衆盛登岸劫掠
有能摧鋒破陣者當行查明即賞銀一百兩所斬功級仍照賞
格另與敘陞水戰賊勢強大緊急有能衝鋒犁沉賊船一隻者
原議賞銀一百兩今議加賞一百兩其隨衆對陣擒斬者俱照
題准常格敘陞不願陞者照數賞銀每歲於春汛之初行令各
府於兵餉銀內每將官處如數解發收貯就於賞犒出洋之日
將銀陳列於前令衆目共覩諭云有能衝鋒擒賊即給此銀人

情見利勇氣自信此又鼓舞之一機也

一嚴職掌照得本道職專兵馬錢糧董理軍務止總大綱而各府

原設海防同知以稽軍伍以察兵情以經糧餉以謹出納各有

司存今於一切徵給兵餉皆不預聞殊失設官初意今後海防

官務遵近題事例蘇州者駐劄吳淞松江者駐劄金山常州者

駐劄江陰鎮江者仍留本城專一稽查軍伍關防出納至於各

府州縣兵餉軍儲等項已經條列亦責催徵仍不時親詣各州

縣比較務要完全以足軍餉如各州縣掌印管糧官不行依期

徵解海防官不行督察催徵者定行查照近例汎畢舉劾之時

一併參論庶責成既專而事體歸一矣

一明體統照得將領體統先該兵部題奉欽依鎮守總兵帶有

都督職銜者各該府州縣等官須執鎮屬之禮凡有關係白俱用

申呈如係參游移文府官止行經歷司府官移文亦經歷司轉
達其州縣悉與申呈相見禮儀俱各平處若係都司自有便文
以通往來不須另議已經通行除參游與府佐州縣正官禮節
無容別議外合將總兵禮節再行申明知府官尊應准平處府
佐州縣正官用官銜帖由角門傍坐州縣佐貳首領官行庭參
禮各官自今伊始務宜恪遵凡有事於地方必須協和行事如
有故違該衙門徑自申呈據法參治

書存稿後

余弱齡好吟甫弱冠與兄姪輩讀書山中故多山中之作時方治經生業惟對景適興不暇求工也及壯游金陵與一時作者相賡咏始稍稍屬意故稿中惟金陵諸作稍可觀既濫仕籍宰邑治郡日與俗吏相對則又悉置去矣間於游覽荅贈輒復一作積數十年所存詩文稿成數帙治兵吳中時王長公元美為序之欲余付梓余恐貽笑大方收之一篋置書室中甲午除夕值回祿倉皇不及持出悉付煨燼一僕少掌書記間以所草詩稿蓄之家偶檢得之兒輩復纂寫成帙僅存十之二三曩余守魏博時與南樂魏氏諸昆投文字知今長君中丞撫晉陽以所刻詩草并仲子詩見寄且索余遺稿曰子雲太玄可能付侯芭否余重違中丞雅意命兒輩錄寄覽之僅可覆醬瓿耳

太原本作大
芭原本作巴

萬曆丙申秋日陽湖八十老翁叔杲書

Faint, illegible text in a grid format, likely bleed-through from the reverse side of the page.

陽湖文獻卷之...



溫州市圖書館

WENZHOU LIBRARY

左右
原本
右左

錄玉介園存稿書後

先參知公為諸生時偕伯父西華公讀書大羅山中討論之暇不
廢咏歌洞壑探奇墳簾迭奏稍稍累成卷及成進士歷敷仕路者
若干年而撰結日積始令吳中入為武部郎出守魏郡所至興學
羣俊彥而躬課其藝文公餘則與客吟嘯忘其身之在官也及治
兵三吳時牘檄旁午公左右籌畫綽有游刃時拉高勝之士品泉
鬪茗命觴探韻江左傳為美譚無何以議漕事迂當路意遂飄然
投傳歸公素志山水日惟徜徉華麓陽湖園墅間與二三知契攬
勝賦詩餘二十稔懷況不減疇昔蓋公夙抱經濟略恒不勝其高
蹈冲夷之趣而意旨所屬率本之自得而歸之實用故於文辭不
事菁藻乃當代宗匠亦或許為一家言萬曆歲不肖孤美懼其久
而逸也乃次為集詩以歲編文曰敘日記曰傳曰尺牘曰志銘誄



温州市图书馆

WENZHOU LIBRARY



温州图书馆

WENZHOU LIBRARY



温州市图书馆

WENZHOU LIBRARY

0268